

GAY MARABƏŇ UWANA

MARK ATSETSÈR

Evangile selon Marc

*Marəhay aŋa Yuhana masla madàh batem.
(Mata 3.1-12; Luka 3.1-18; Yuhana 1.19-28)*

¹ Aganay gay delga uwana adzəka à vok lakəl aŋa Yesu, Kona aŋa Zəzagəla, uwana mafal dzakwa à gəl gà.

² La wakità uwana la abà Yesayya atsetsèr, Zəzagəla agòd:

“Aganay gəsləl à awtày masləlay gulo, la huma aŋak kà madàhkanj tetəvi à ahəŋ.”[✧]

³ Uwaga kà kuda aŋa dza uwana awiyay la fəta la abà:

“Dahàwla azlatetəvi à Sufəl Zəzagəla à ahəŋ tərta.”[✧]

⁴ Kiya uwaga Yuhana apəhla vok ala la fəta la abà. Az gay Zəzagəla, anavà azladza uwana tasà à waŋ à slaka aŋha: “Kèsàw batem, uwana apəhla ala kà kadapəhaw gay la ləv ala, ŋgaha Zəzagəla adàmamatsakula tsakana ala.”

⁵ Azladza la makoray masla Yahudiya, la azladza la Urusalima gesina, tasà à waŋ à slaka aŋha, uwana tasəlla tsakana aŋatà à uda. Yuhana adahà à atà batem la mukwà Urdun la abà.

⁶ Yuhana adùw lukut madfehəŋga à vok la aŋidz aŋa zlugumi, rəts awadà vok ala la para-para zlap, tatak may aŋha kà hayyaw la zuway mazuway.

⁷ Apèh à azladza, agòd à atà: “Dza uwana atsa à waŋ la lig gulo la ahəŋ kà, aduwa gi la məŋga, gəsla gay kà makəl gəl à ahəŋ aŋa mapəl zuwid kwimik aŋha ala aw.

⁸ Gi kà, gəfahakulla batem kà la iyaw, ama masla kà adfahakullanj kà la Masasəđok Zəzagəla.”

*Yuhana adfəh batem à Yesu
(Mata 3.13-17; Luka 3.21-22)*

⁹ La abatà Yesu asà à waŋ la gudəŋ Nazaret la kutso Galili. Yuhana adfahalla batem la mukwà Urdun la abà.

¹⁰ Mok uwana Yesu asà à uda la iyaw la abà, anəŋà à zagəla kà, zagəla mapəzl à ama ala gà. Anəŋà Masasəđok Zəzagəla atsà à ahəŋ à gəl aŋha bokuba habakoku.

¹¹ Nŋaha tatsənà kuda uwana atsən à ahəŋ la zagəla: “Kak bəzi gay ləv gulo, gərabay məŋga kà kak.”✧

*Sufəl aŋa mawisiga apapat Yesu
(Mata 4.1-11; Luka 4.1-13)*

¹² La lig la ahəŋ, katskats Masasəđok Zəzagəla adala Yesu à fəta à abà.

¹³ Adzà à ahəŋ la abatà mavakay dzik ufad, ŋgaha seteni apapat masla. Yesu adzà à ahəŋ la tataka azlatatak fəta la abà, ŋgaha azlamalika tazlək masla bay.

✧ **1:11 1.11** 1Musa 22.2; Mahabay 2.7; Yesayya 42.1

*Yesu azal azlaməna makas kilfi ufad
(Mata 4.12-22; Luka 4.14-15; 5.1-11)*

¹⁴ Tadùw Yuhana à daɲay, kiya uwaga Yesu ahàd à kutso Galili, kà maz gay matsidayga aɲa Zəzagəla.

¹⁵ Agòd: “Kaslà adaslay à dagay kà Zəzagəla adzəka makoray aɲha. Pèhàw gay la ləv ala, dìɲàw gəl à gay matsidayga aɲa Zəzagəla à vok!”

¹⁶ Mok uwana Yesu anəf à gay dərəv aɲa Galili, anəɲà azlaməna makas kilfi səla, Səmon la deda aɲha Andəre. Tadàw dzarawa à iyaw abà kà makasla kilfi.

¹⁷ Yesu agòd à atà: “Sàw à waɲ, nèfàw gi, gədàpakakulla kà azlaməna makas azladza.”

¹⁸ Katskats tasàk à dzarawa aɲatà, tanəfà masla.

¹⁹ Uwana adada à huma à gay ɲuv, anəɲà azlabəza aɲa Zebede, Yakuba atà la Yuhana, atà la kəslah iyaw la abà tadàh dzarawa aɲatà.

²⁰ Katskats Yesu azàla atà, tasàk à baba aɲatà à ahəɲ la azlaməna sləray aɲha la kəslah iyaw la afik, ɲgaha tanəfà Yesu.

*Dza la masasəfok mawisiga
(Luka 4.31-37)*

²¹ Yesu la azlaməna matapla la slaka aɲha tahàd à Kapernahum. La vuɖ maduw ləv aɲa azla Yahudiya, Yesu adà à gày madəv kuɖa aɲatà à agu kà matapatàla.

²² Azladza uwana tatsənà gay aɲha kà, ləv avàl atà à gay, kà uwana atapàtala kà

bokuba azlaməŋga aŋa azlaməna madzeŋ wak-ità Zəzagəla aw, ama bokuba dza uwana akor ndzəda.

²³ Mok uwatà, dza la masasəfok mawisiga apəhla vok ala la gày madəv kudfa uwatà la aku, awiyà:

²⁴ “Mana à gay aŋak la anu ma? Yesu, kak zil Nazaret! Kasà à waŋ kà mazanula ay? Gəsəl kà, kà kak Tsikaslaga uwana Zəzagəla aslèl kak à waŋ.”

²⁵ Yesu aslèh məlo à masasəfok uwatà à gəl: “Dzà à ahəŋ titi! Sà dza uwaga lakəl ala!”

²⁶ Ŋgaha masasəfok mawisiga abəllakà dza uwatà la ndzəda, awiyà la kuda məŋga, ŋgaha asàlla à kəl ala.

²⁷ Ləv avəl atà à gay gesina. Tanəvəhà à vok: “Mana gay mawga uwanay asal magofay ma? Mana uwaga ma, akor azlamasasəfok mawisiga la ndzəda, ŋgaha azlamasasəfok mawisiga bay tafa à gəl à gay aŋha?”

²⁸ Katskats azladza tazəhà gay lakəl aŋa Yesu la kutso Galili gesina.

*Yesu awar azlaməna fuvats ala aŋuvaw
(Mata 8.14-17; Luka 4.38-41)*

²⁹ Uwana tasà à uda la gày madəv kudfa la aku kà, katskats Yesu ahəd atà la Yakuba ŋgaha la Yuhana à mtəga aŋa Səmon la Andəre.

³⁰ Məŋay aŋa Səmon la akəl la vok la slaka mahən à ahəŋ. Mok uwana Yesu abəz atà à vok kà, tapəhal gay lakəl aŋha.

³¹ Yesu ahàd à slaka aṅha, akès la ahàl, atsizllàṅ ala, ṅgaha akàl vok asàlla vok ala. La lig la ahəṅ mis uwatà azlāk atà.

³² La mokokhu, mok uwana afats adatəf à ahəṅ, azladza tasàhla azlaməna dʻuvats aṅuvaw à waṅ à slaka Yesu, la azlauwana la masasəfok mawisiga.

³³ Azladza gudəṅ uwatà tahamà gay à vok la gay gamagày aṅha.

³⁴ Yesu awarəṅ ala azladza aṅuvaw uwana tas ṅgərpa la azladʻuvats anik anik gesina, la makudəkàh azlamasasəfok mawisiga, afàhà à atà akur à lig kà mapəhlaṅ ala aw, kà uwana atà: “Məsəl Yesu”, tagòd.

*Yesu auguzahay la kutso Galili
(Luka 4.42-44)*

³⁵ Lebəṅ gà bəṅ, afats à lig mas à afik, Yesu atsizlla ala, ṅgaha asà à uda la kay, ahàd aṅha à fəta à abà ṅgaha adəv kuḍa la abatà.

³⁶ Səmon atà la azlamanalay aṅha tahàd kà mayàh masla.

³⁷ Uwana tabèzal à vok, “Azladza gesina tayàh kà!”, tagòdal.

³⁸ Ama Yesu agòd à atà: “Məhàd à azlagudəṅ anik anik, gədàpəhay gay Zəzagəla la abatà babay, kà uwana gəsà à waṅ kà madàh sləray uwaga.”

³⁹ Kiya uwaga auguzàhàh la kutso Galili gesina. Apàh gay matsidayga la azlagay madəv kuḍa aṅatà la aku, ṅgaha akudəkàh azlamasasəfok mawisiga à uda.

*Yesu awura masla akàl zagəla ala
(Mata 8.1-4; Luka 5.12-16)*

⁴⁰ Masla akàl zagəla asà à wan à slaka Yesu, akədèdàl à huma à gay, anàval: “Kamkam, baŋa asa à ka kà, kaslala vok kà mawur gi ala!”

⁴¹ Vok ahàm à Yesu, abiyà ahàl ala, adəbani, ŋgaha agòdàl: “Asa à gi, wùr ala!”

⁴² Katskats akàl zagəla asàl à vok ala, awùr ala.

⁴³ La lig la ahəŋ, Yesu awùl à masla la mafahal akur à lig, agòdàl:

⁴⁴ “Tsənàŋ lela, kapəh uwaga à dza anik aw, ama hād kadàpəhla vok à masla mav tatak à Zəzagəla, kà kadawurla, ŋgaha vā tatak uwana Musa apəh à ahəŋ kà masəlay kà kawùr ala.”✧

⁴⁵ Ama dza uwatà ahād, adzəkà mapəhay à azladza gesina lakəl aŋa mawurla aŋha. Gay gā la uwaga à uwana Yesu aslāla vok kà mad gudəŋ à abà la dazuwaya aw. Kà uwaga à uwana Yesu adzà à ahəŋ la uda la fəta la abà, la abatà bay, azladza tadàh à awtày à slaka aŋha la kəla slaka gesina.

2

*Yesu awur dza makalàh à vədah gā ala
(Mata 9.1-8; Luka 5.17-26)*

¹ La lig mahənay ŋuv Yesu ahād à Kapernahum aya. Uwana tatsənàŋ Yesu la kay kà,

² azladza aŋuvaw tahamà ahəŋ tsərəh à uwana slaka atəm à ahəŋ bamərika la gəl akàl aw, apəh à atà gay Zəzagəla.

✧ 1:44 1.44 3Musa 14.1-32

³ Ngaha azladza anik tasà à waŋ à slaka aŋha, tasèlla dza makalàh à vɔfah gà à waŋ, azladza ufad la tsəh tazəbay.

⁴ Ama tabèz à tetəvi kà madla à slaka Yesu aw, kà uwana maham à ahəŋ dza aŋuvaw la ahəŋ, tadala à gəl gày à afik, tapokwà gəl gày uwana Yesu la kay la afik, uwana tapokwàŋ tadzilà dza makalàh à vɔfah gà uwatà à gày la kəslah gà.

⁵ Uwana Yesu anəŋəŋ madiŋal gəl à vok aŋatà məŋga, agòɔf à dza makalàh à vɔfah gà uwaga: “Bəzi gulo, tsakana aŋak adàmatsila!”

⁶ Ama azladza anik la tataka azlaməna mapàhla wakità seriya la abà la slaka madzàh madzay la abatà, tadzùgw la gəl aŋatà:

⁷ “Kà mana dza uwanay apəhay mawisiga lakəl aŋa Zəzagəla kiya uwaga ma? Dza aslala vok aŋa mamats tsakana à dza ala aw, say Zəzagəla pəra!”

⁸ Katskats Yesu asəl uwana tadzugway la ləv aŋatà la tsəh, agòɔf à atà: “Kà mana kadzugwaw kiya uwanay la ləv aŋkul la tsəh ma?”

⁹ Butu mala zlazlada magoɔfay: gədàmats à ka tsakana aŋak ala takay? Awma: Sà à afik, zəb kəslah aŋak, hād aŋak takay?

¹⁰ Ama asa à gi kasəlaw, kà gi kona aŋa dza, ŋgaha kà gi la masəlay aŋa mamats tsakana aŋa azladza gudəŋ à vok ala:

¹¹ Sà à afik, zəb kəslah aŋak, hād mtəga aŋak! Gəgoɔf à kak”, Yesu agòɔf à dza makalàh à vɔfah gà.

¹² Katskat asà à afik, azəb kəslah aŋha. Uwana azladza gesina tanəŋəŋ adìŋ aŋha, ləv avàl à atà à gay gesina, tazləbà Zəzagəla, tagòɔf: “Məda-

nəŋəŋ d̄ikid̄iki kiya uwanay aw!”

*Yesu azala Levi
(Mata 9.9-13; Luka 5.27-32)*

¹³ Yesu awùlla à gay dərəv aya, sləm aŋha kà dərəv Galili. Azladza aŋuvaw tahamà à waŋ à slaka aŋha, ŋgaha atàpatàla.

¹⁴ Uwana adà à awtày, anəŋàŋ Levi, kona aŋa Alfe, adadza madzay la gày mazəb hadama la aku. Yesu agòdal: “Sà à afik, nəfà à gi!” Levi asà à afik, anəfà.

¹⁵ La lig la ahəŋ Yesu la azlaməna matapla aŋha tahàd à mtəga Levi kà mazuw tatak may. Azlaməna mazəb hadama aŋuvaw la azlaməna tsakana aŋuvaw, tadzàhà madzay atà nna, kà uwana azladza tsəhay gə uwaga aŋuvaw tanəfà atà aya.

¹⁶ Azlaanik la tataka azlamadzahaga aŋa wak-ità seriya aŋa Zəzagəla la abà, uwana la tataka aŋa azla Farisəya la abà, tanəŋàŋ kà Yesu azùw tatak may la slaka gə la azlaməna mazəb hadama la azladza tsakana, tagòd à azlaməna matapla la slaka aŋha: “Kà mana azuw tatak may la azlaməna mazəb hadama la azlaməna tsakana ma?”

¹⁷ Uwana Yesu atsənà uwaga, agòd à atà: “Azladza uwana d̄uvats aza à ata aw, kà tayàh mad dokwtar aw, say azlaməna d̄uvats pəra. Gi, gəsà à waŋ kà mazalay azladza uwana tadzugw kà azladziriga aw, ama gəsà à waŋ kà, kà mazal azlaməna tsakana.”

*Manavay lakəl aŋa makəs nəlay
(Mata 9.14-17; Luka 5.33-39)*

18 Azlaməna matapla aṇa Yuhana, masla madfàh batem la azla Farisəya takasàh nəlay la azlakaslà anik anik. Azladza anik tasà à waṇ à slaka Yesu, tanàval: “Kà mana azlaməna matapla aṇa Yuhana, masla madfàh batem, la azla Farisəya kà takas nəlay, ama kà mana azlaməna matapla la slaka aṇak kà takas nəlay aw ma?”

19 Yesu agòd à atà: “Baṇa dza azəb mis azàläh azlaslawda aṇha kà mazuw tatak may, ma tasàk tatak may la mavakay uwatà aṇa makəs nəlay takay? Awaṇ, tasàkal aw, tazuway.

20 Ama mok uwana zil mis adàdiṇ aṇha la slaka aṇatà, la uwana tadàkas nəlay adàgay la mok uwatà.”

21 Yesu agagàzlla atà ala la matapatla mawga aṇha uwanay: “Dza atsap lukut mawga à maviyaga à vok aw. Baṇa adefhəṇ kità kà, lukut mawga akwàh maviyaga à tsəh, ṅgaha makwàhla aṇha azàh à tsəh aya.

22 Dza adaw iyaw aṇa mayyay ahàf mawga à kiwa iyaw maviyaga à agu aw, kà uwana à baṇa amsəlila kà, akwàh kiwa ala. ṅgaha iyaw aṇa mayyay ahàf la kiwa iyaw tadàuwisila. Ama aduwa à vok kà tadaw iyaw aṇa mayyay ahàf mawga à kiwa mawga à agu, suwaṇ.”

*Manavay lakəl aṇa vudf maduw ləv
(Mata 12.1-8; Luka 6.1-5)*

23 Vərdi anik la vudf maduw ləv, Yesu aguwa à awtày la gay guf nalkama. Azlaməna matapla la slaka aṇha tadzəkà mabəradahay nalkama la tetəvi la ama.✧

24 Azla Farisøya tagòf à Yesu: “Kà mana azlaməna matapla la slaka aṅak tafàh tatak uwana azlayla kà à vok aw ma? Kà uwana wakità seriya gami avəra gay kà tatak uwaga la vudf maduw ləv.”

25 Yesu awùlla à atà ala: “Kadzèṅàw ðikidiki aw uwana David adahàṅ la mok uwana may akès la azladza uwana la slaka aṅha aw uwà?”

26 Ahàd à gày Zəzagəla à agu, azəb kaf uwana tafàh à huma aṅa Zəzagəla, azùw. Mok uwatà kà, Abiyatar la uwana məṅga aṅa azlaməna mav tatak à Zəzagəla. Wakità seriya gami kà, avà tetəvi kà azlaməna mav tatak à Zəzagəla kà mazuway pəra. Ama David azəb, azùw, ṅgaha avàh à azlaməna aṅha bay.”✧

27 Yesu agòf à atà aya: “Zəzagəla adahà vudf maduw ləv kà, kà madz à ahəṅ delga aṅa dza, awkà Zəzagəla adahà dza kà aṅa vudf maduw ləv aw.

28 Gay gà la uwaga gi Kona aṅa dza la uwana Sufəl aṅa vudf maduw ləv.”

3

*Yesu awur dza uwana ala la ahəl mamətsayga
(Mata 12.9-14; Luka 6.6-11)*

1 La vərđi anik, Yesu ahàd à gày madəv kuđa à agu aya. La gày uwatà la aku kà, dza la ahəṅ uwana ahəl aṅha mamətsayga.

2 Azladza la ahəṅ la gày madəv kuđa la aku, tanə̀̀z Yesu à baṅa awur dza ala la vudf maduw ləv, kà atà mabəzal à tsəh la gay la abà, kà

✧ 2:26 2.26 1 Samuyel 21.1-6; 3Musa 42.9

uwana akès mapəhay lakəl aṇa vuɸ maduw ləv aw.

³ Yesu agòɸ à dza uwana ahəl aṇha mamətsayga: “Sà à afik, sà à waṇ à huma azladza gesina!”

⁴ Ngaha anəv azladza uwana tatsəkəl yewdi à gay: “Mana wakità seriya gami apəh à anu ma? Tetəvi la ahəṇ kà maɸàh delga la vuɸ maduw ləv takay? Awma maɸàh mawisiga takay?” Asà à atà mawulla gay à uda aw. Takwès.

⁵ Yesu atsəkà à atà yewdi à gay la mazinal à gəl. Ama apək ləv mənḡa kà madzugway mawisiga aṇatà. Kiya uwaga agòɸ à dza uwatà: “Biyà ahəl ala!” La kirim yewdi awùr ala.

⁶ Batsàrà, uwana azla Farisəya tanəṇ uwaga kà, tasà à uda la gày Zəzagəla la aku, tahəd, tahamà gay à vok la azladza maham à ahəṇ gà uwana tatsən vok gay la Herod kà aṇa magəɸ uwana à afik azlayla makəɸla Yesu.

Maham à ahəṇ dza asa à waṇ à slaka Yesu

⁷ Yesu la azlaməna matapla aṇha tazà vok. Tahəd à gay dərəv aṇa Galili, maham à ahəṇ dza aṇuvaw tanəfà atà. Azladza tasàhà à waṇ la makoray Galili, la Yahudiya,

⁸ la Urusalima dagay la gay dzika makoray aṇa Idumiya tsərəh à gay dzika aṇa dərəv uda aṇa mukwà Urdun, la azladza uwana tadzà à ahəṇ nekwa la gudəṇ Tir la Sədon. Magol maham à ahəṇ dza tasàhà à waṇ à slaka Yesu kà uwana tatsənəṇ lakəl aṇa tatak uwana adahàhəṇ.

⁹ Yesu agòd à azlamèna matapla la slaka aṅha: “Yàhàw à gi bēzi kēsrah iyaw, kà maham à ahəṅ dza aṅa maṅisl gi aw.”

¹⁰ Yesu awurà azladza ala aṅuvaw, gay gà la uwaga azladza uwana tasà ṅgərpa la azladuvats anik anik tavàhà vok kà madəbani masla.

¹¹ La mok uwana azladza uwana la azlama-sasədok mawisiga tanəṅà masla, tatəfal à huma la mawiyay, tagòfal: “Kak, Kona aṅa Zəzagəla!”

¹² Ama Yesu aslèhà atà məl à gəl la ndzəda, kà mapəhla masla ala aw.

Yesu akasani azlamèna matapla kulo gəl aṅha səla

(Mata 10.1-4; Luka 6.12-16)

¹³ Yesu ahəd à dadəgwəl à afik, ṅgaha azàl azladza uwana asàl, kà tatsà à waṅ à slaka aṅha.

¹⁴ Yesu akàsàni azladza kulo gəl aṅha səla, ṅgaha azàla atà ala azlamèna matapla la slaka aṅha, agòd à atà: “Gəkàsàni akul kà madz à ahəṅ la slaka gulo, ṅgaha gədàslal akul kà mapəh gay Zəzagəla.

¹⁵ Gəvà à akul maslay kà makudəkàh azlama-sasədok mawisiga.”

¹⁶ Aganay azladza kulo gəl aṅha səla uwana akàsàni atà: Səmon uwana Yesu avàl sləm Piyer;

¹⁷ Yakuba la deda aṅha Yuhana, azlabəza aṅa Zebede. (Yesu avà à atà sləm Bowanergəs, asal magodəy: maslèh məl aṅa habaga, kà uwana tasaf à mapak ləv aw)

¹⁸ La Andəre; Filip; Bartelemi; Mata; Tomas; Yakuba, bēzi aṅa Alfe; Tade; Səmon zil Kananan

¹⁹ ngaha Yudas Iskariyot, uwana adàda kà mēzam à Yesu à gəl.

Azlaməna huɸ gày aŋa Yesu asa à atà aŋa madla Yesu à mtəga

²⁰ Yesu ahəd à mtəga aŋa dza anik. Maham à ahəŋ dza tahamà gay à vok aya, kà uwaga à uwana Yesu la azlaməna matapla la slaka aŋha tabəzà tetəvi kà mazuw tatak may aw.

²¹ Mok uwana azlaməna huɸ gày aŋha tatsən uwaga, tahəd kà masəla à mtəga, kà uwana azladza tagòɸ kà: “Gəl adakadəl à vok!”

Azladza tatsəɸ gay à Yesu à tsəh ngaha awulla atà ala

(Mata 12.22-32; Luka 11.14-23; 12.10)

²² Azlamadzahaga aŋa wakità seriya tasà à ahəŋ la Urusalima tagòɸ: “Masla la Belzəbul, sufəl aŋa zagəla zagəla!”, asal magoɸay sufəl aŋa azlamasəɸok mawisiga. Azlaanik tagòɸ: “Sufəl aŋa azlamasasəɸok mawisiga avəl maslay kà makudək azlamasasəɸok mawisiga.”

²³ Yesu azəl azladza à slaka aŋha, agòɸ à atà: “Kakay sufəl aŋa masasəɸok mawisiga aslala vok aŋa makudək seteni à uda aya ma? Akəsà vok aw.

²⁴ Baŋa azladza la makoray tekula tatsak ala kà, makoray sufəl uwatà kà aslala vok madz à ahəŋ aw.

²⁵ Baŋa azladza la huɸ gày tatsak ala kà, huɸ gày uwatà aslala vok madz à ahəŋ aw.

²⁶ Baŋa seteni ap guvəl à vok aŋha à adi kà, makoray aŋha adavahla, aslala vok aŋa madz à ahəŋ aw, ama makoray uwaga adədəv à gay.

²⁷ Dza aslala vok aṅa mad à gày aṅa masla ndzəɖa kà mazəb̄ tatak aṅha aw, say atsərkwiṅ dadàṅ, ṅgaha aslala vok kà mahəl tatak aṅha gesina.

²⁸ Gəpəh à akul la dziriga: Tsakana gesina la gay mawisiga gesina uwana azladza tapəhay, Zəzagəla adàmatsataṅ ala.

²⁹ Ama dza uwana apəh mawisiga lakəl aṅa Masasəɖok Zəzagəla kà, tsakana uwaga adàmatsila d̄ikid̄iki aw, ama tsakana uwaga adàdza à ahəṅ aṅa koksikoksi.”

³⁰ Yesu apəh kiya uwaga kà, kà uwana azlaanik tagòɖ kà: “Masla la masasəɖok mawisiga”, tagòɖ.

*Iyà la azladede aṅa Yesu
(Mata 12.46-50; Luka 8.19-21)*

³¹ Iyà la azladede aṅa Yesu tasà à waṅ, tasləl dza kà mazal à atà la uda.

³² Azladza aṅuvaw tadzàhà madzay la makəla aṅa Yesu, tagòɖfal: “Iyà la azladede aṅak la uda, tazala ka!”

³³ Yesu awùl à atà ala: “Uwa iyà gulo la azladede gulo uwa?”

³⁴ ṅgaha Yesu anə̀rèz azladza uwana la makəla aṅha lakəl, agòɖ à atà: “Aṅanay azlaiyà la azladede gulo la abanay.

³⁵ Kà uwana kəla uwabeyuwi uwana adàh mawoyəṅ aṅa Zəzagəla la uwana azladede gulo la azlaiyà gulo.”

4

*Gay la gay la abà aṅa masla maslæk hi
(Mata 13.1-9; Luka 8.4-8)*

¹ Yesu atàpla à maham à ahəṅ dza la gay dərəv aṅa Galili aya. Aṅuvaw tahamà gay à vok la slaka aṅha. Kà maham à ahəṅ dza, Yesu adà à kəslah iyaw à afik, adzà madzay. Ama maham à ahəṅ dza la gay dərəv.

² Yesu apəhatàla azlatatak aṅuvaw la gay la gay la abà, ṅgaha agòḍ à atà la matapla aṅha la abà:

³ “Tsəbàwwal sləm!”, Yesu agòḍ à atà, “Dza anik asà à uda kà mad maslæk hi.

⁴ Mok uwana adadzəka maslæk hi à guf aṅha à abà, fofulo anik tanis à gay tetəvi, azladīyan tasà à waṅ, tazùw à gay.

⁵ Azlaanik aya tanis à pala akur à afik uwana kutso lakəl məṅga aw, katskats asà à uda, kà uwana kutso la pala akur lakəl məṅga aw.

⁶ Mok uwana afats adadzəka mavəḍay la ndzəḍa agulà hi ala kà uwana abək slilih kà à pala à akur à afik.

⁷ Gotənaṅ fofulo anik tanis à atək à abà. Uwana atək azigəṅay akəḍ à tsəh, atsà à gəl aw.

⁸ Bə gotənaṅ fofulo anik tanis à kutso delga gə à abà. Asà à uda lela azigəṅ lela, ṅgaha atsà gəl lela. Anik abək à adi huməts, anik abək à adi zuṅ, ṅgaha anik aya bay zazuṅ səla.”

⁹ Yesu agòḍ à atà: “Tsəbàwwal sləm lela, wəḍəw vok à uda kà mafal sləm!”

*Kà mana Yesu apəhay la gay la gay la abà ma?
(Mata 13.10-17; Luka 8.9-10)*

10 Mok uwana Yesu kokudfa aṅha, azladza uwana tatsəbal sləm, la azlaməna matapla la slaka aṅha kulo gəl aṅha səla, tasà à waṅ à slaka aṅha, ṅgaha tanàv godega aṅa gay la gay la abà uwatà.

11 Yesu agòd à atà: “Akul kà, Zəzagəla avà à akul nasiri aṅa makoray aṅha, ama azladza anik tatsən tatak gesina kà say la gay la gay la abà pəra.

12 Kà uwaga à uwana:
 'Tanərzay la yewdi aṅatà babay, ama tanəṅaṅ la dziriga aw,
 Tatsəbal sləm la sləm aṅatà babay, ama tatsənaṅ la dziriga aw,
 Kiya uwaga kà atà aṅa mawul à slaka Zəzagəla aw, ṅgaha Zəzagəla aṅa amatsa à atà tsakana aṅatà ala aw!’”☆

Yesu apəh godega aṅa gay la gay la abà uwaga à uda

(Mata 13.18-23; Luka 8.11-15)

13 ṅgaha Yesu anàv à atà gay ala: “Katsənàw gay la gay la gay la abà uwanay aw takay? Kakay kadatsənaw gay la gay la abà anik zla ma?

14 Masla masləkay kà masla mapəh gay Zəzagəla.

15 Azladza anik kà bokuba gay tetəvi uwana fofulo anis ala ama: Mok uwana tatsənəṅ, katskats seteni asa à waṅ, abəd atà à ləv ala gay uwana tasləkà à ləv à tsəh.

16 Kiya uwaga bay la azladza anik tadəbani slaka pala akur gə, à uwana gay anis à afik, katskats uwana tatsən gay kà takəs la marabay.

☆ 4:12 4.12 Yesayya 6.9-10

17 Ama tasàkal adàla slilih la lèw aṅatà la tsèh aw, tafàl slèm la lela aw, takès kà aṅa kaslà ṅuv pèra. La mok uwana ṅgèrpa la matèrèbay adaḅèz atà kà gay Zèzagèla kà, katskats tasàk madiṅ gəl à vok aṅatà la tsèh ala.

18 Azladza anik aya kà tadèbani à vok la gày atàk uwana fofulo anis à abà. Tatsèb slèm à gay.

19 Ama adi aṅa gudəṅ à vok uwanay la matsiday aṅha uwana apapàt azladza, adà à lèw aṅatà à tsèh, akèḍ gay maslèkayga uwaga à tsèh, ṅgaha azladza uwaga tav mayyay aw.

20 Azladza anik aya gotənaṅ kà tadèbani à vok la kutso uwana fofulo anis à abà. Atà tatsèb slèm à gay lela, tafàl slèm lela, tavà mayyay, anik abèk à adi humèts, azlaanik zuṅ, azlaanik aya gotənaṅ zazūṅ sèla.”

*Gay la gay la abà aṅa fənəs la tsèh gogozläh
(Luka 8.16-18)*

21 Yesu agòḍ à atà aya: “Dza af fənəs à tsèh tasà takay, awma à tsèh gogozläh ay? Awanṅ, aduwa vok kà dza af fənəs à slaka dzəgamma gà.

22 Bokuba magoday, tatak mahadəṅ à ahəṅ gà ada à gay mapəhla à vok ala gà. ṅgaha nasiri gesina, azladza tadàsəlay.

23 Tsèbàwwal slèm lela à baṅa slèm aga akul lakəl.”

24 Yesu agòḍ à atà aya: “Dahàw hanḅkəli lakəl aṅa tatak uwana katsənawwanṅ la uwana kada-hawwanṅ. La daram uwana kagoraw la azladza, Zèzagèla adàgor akul la uwaga la mazakullanṅ à gəl suwanṅ.

²⁵ Kà uwana dza uwana af slèm à uwana Zəzagəla avàl, adàbəzal mənğa aya. Ama dza uwana af slèm à tatak aw, tadədəvalla à ahàl ala ŋuv gà uwatà Zəzagəla avàl aya babay.”

Gay la gay la abà aŋa fofulo uwana atsa à uda

²⁶ Yesu agòd à atà aya: “Məslala vok magagazləla makoray Zəzagəla kà la dza uwana asləkà fofulo à guf aŋha à abà.

²⁷ La lig la ahəŋ kà say madzəhal aŋha kəla mahənay pəra. La kaslə uwana fofulo adas à uda azigən la kokuda masəlay aŋha.

²⁸ Kutso azigəna makəl gay aŋa tatak: Terəŋa kavak gà, ŋgaha masəh gəl à uda, la maḃək bəza adi.

²⁹ Mok uwana tatak adahənay, dza adzəka sləray la mavaw aŋha, kà uwana matsəf tatak adasa à waŋ.”

*Gay la gay la abà aŋa tsəhay fofulo uwana bəziga gà la tataka azlafofulo anik anik la abà
(Mata 13.31-32,34; Luka 13.18-19)*

³⁰ Yesu anàv à azladza la gay la: “La mana makoray Zəzagəla adəbani vok ma? La gay la gay la abà ma uwala məgagazləla makoray aŋha la?

³¹ Adəbani vok kà la tsəhay uwana bəziga gà la tataka azlatsəhay fofulo anik la abà gesina bokuba tsəhay hamadz.

³² Ama baŋa azigənay kà, aduwa azlababasl anik anik gesina. Azigənay mənğa, aduwa azlaahàf anik, azləl ahàl mənğa, ŋgaha azladfiyan tadza à ahəŋ la dzəgay aŋha la abà.”

³³ Kiya uwaga Yesu apèh à atà gay Zəzagəla la azlagay la gay la abà aṇuvaw bokuba uwanay. Apèh à atà kà bokuba uwana azladza taslalà vok aṇa matsənəṇ.

³⁴ Apèh à atà kà bà la gay la gay la abà pəra. Ama uwana masla la azlaməna matapla la slaka aṇha kokudā gəl aṇatà kà, apèh à atà ala tatak gesina la paraka.

*Yesu atsizlla kular à ahəṇ
(Mata 8.23-27; Luka 8.22-25)*

³⁵ La mokokhu vuḏ uwatà, Yesu agòḏ à azlaməna matapla la slaka aṇha: “Məhàḏ à gay dərəv uda anik.”

³⁶ Kiya uwaga tasàk à maham à ahəṇ dza à ahəṇ, azlaməna matapla la slaka aṇha tadà à kəslah iyaw uwana à afik, Yesu atsà à vok à afik. Azlakəslah iyaw anik la ahəṇ la abatà bay aw.

³⁷ Magol kular adzəkà madəḏəy. Magaṇtsay aṇa iyaw adàh à kəslah iyaw à abà, kiya uwaga kà ahənənəṇ ala.

³⁸ Yesu agà la godega kəslah iyaw la madzəhal gə, afà gəl à tatak maf gəl à afik à afik. Azlaməna matapla la slaka aṇha tatsənənəṇ ala la magoḏal: “Məṇga, məzləmətsay, kafa à anu gəl aya aw, takay?”

³⁹ Yesu atsənà ala, aslèh məlo à kular à gəl. Apèh la ndzəḏa à magaṇtsay aṇa iyaw: “Dzà à ahəṇ titi!” Kular atsizl à ahəṇ, iyaw adzà à ahəṇ titi, magaṇtsay aṇa iyaw la ahəṇ aya aw, tsiriya.

⁴⁰ La lig la ahəṇ agòḏ à azlaməna matapla la slaka aṇha: “Kà mana guba akès à akul ma? Kadiṇaw gi gəl à vok aw ay?”

⁴¹ Guba akès atà mənğa tagòf kà atà kà atà: “Uwa à dza uwanay, amiyaka afad la iyaw bay kà takəs gay anha uwa?”

5

Yesu akudək masasəfok mawisiga à dza lakəl ala

(Mata 8.28-34; Luka 8.26-39)

¹ La lig la ahəŋ tabəzà à gay dərəv uda anja gay dərəv anja Galili uwana la kutso Gerasəniya la abà.

² Uwana Yesu adasa à ahəŋ la kəslah iyaw la afik, batsàrà dza anik anəŋà Yesu kərkər, asà à waŋ kà magagamay səla. Dza uwaga asà à waŋ kà la gày zəvay la abà, dza uwatà kà zagəla zagəla lakəl.

³ Adzà à ahəŋ kà la mabuwaŋ zəvay la aku. Dza aslàla vok anja mawadəŋ à ahəŋ ba amiyaka la mazakazak aw.

⁴ Anjuvaw tawàcfàhalla ahəl à ahəŋ la azlamatatasla ahəl, la sasala asik la azlamazakazak anja ada. Ama aslähàhəŋ ala la azlamanal sasala ala. Dza aslàla vok kà makəsij à ahəŋ aw.

⁵ Koksikoksi kəla mahəŋay la mavakay auguzahahay la azlagəl zəvay la azlamatəkukurùh la afik la mawiyay la masàh vok anha la akur.

⁶ Dza uwatà anəŋà Yesu kərkər ŋgaha ahəd la mahoyay à huma anha, atəf à Yesu à huma.

⁷ Awiyà la ndzəfà: “Masak à ama Yesu, Kona anja Zəzagəla uwana la afik. Kamkam gənava à ka, kà la sləm anja Zəzagəla: Sàk à gi, bàsak, kavà à gi ŋgərpa aw.”

⁸ Apèh uwaga kà, kà uwana Yesu afàl gay à gèl: “Kak zagèla zagèla: Sà à dza uwaga la kèl ala.”

⁹ La abatà Yesu anàval: “Uwa slèm anjak uwa?” Masla zagèla zagèla agòfal: “Slèm gulo kà maham à ahèḅ, kà uwana anu anuvaw.

¹⁰ Kamkam mèdèv à ka kufà, kakufèk anu la gudèḅ uwanay aw!”

¹¹ Maham à ahèḅ namzi la ahèḅ la abatà uwana tadzadzàr à vok nekwa la matèkukurùh la afik.

¹² Azlamasasèfok mawisiga tanàv à Yesu, tagòfal: “Slèl anu à maham à ahèḅ namzi à abà pèra, vā à anu tetèvi, mèda à atà à gèl.”

¹³ “Aya, dàw!” Yesu agòf à atà. La kità azla-zagèla zagèla tasà à dza uwatà lakèl ala, ḅgaha tahàd à azlanamzi à gèl gesina. Batsàrà, tahòy à ahèḅ, tavàlàh à iyaw à abà, ḅgaha tasùfàh à abà. Azlanamzi uwaga gesina kà taslà dèbow sèla.

¹⁴ Azlamèna manèḅla azlanamzi tahòy anatà, tadàla gay uwaga kà maziḅ azladza bèza gudèḅ la azlahuf gudèḅ gesina la makoray uwatà. Azladza tasàhà à uda, tasà à wan kà manèḅ tatak uwana adahà vok.

¹⁵ Uwana tabèz à slaka Yesu tanèḅà dza uwana agà la maham à ahèḅ zagèla zagèla lakèl, madza madzayga la lukut la vok, hanjëli adawulla à gèl. Lèv avàl à azladza à gay. Guba akès atà.

¹⁶ Azlamèna manèḅ uwana apakà vok gesina kà, tazàhà gay anja dza uwana la zagèla zagèla lakèl uwarà la anja azlanamzi gesina bay.

¹⁷ La abatà tagòf à Yesu: “Kamkam, sà à uda la makoray gami.” Yesu asà à afik, ahàd à slaka kèslah iyaw.

18 Mok uwana adà à kəslah iyaw à afik, dza uwana agà la azlazagəla zagəla lakəl uwarà, agòd à Yesu: “Kamkam, asa à gi mədaw səla.”

19 Ama Yesu avəl tetəvi aw: “Wùl à huđ gày aṅak, zàhàtəṅ uwana Sufəl Zəzagəla adfahàkəṅ gesina lakəl aṅa uwana vok ahàmal kà kak!”, agòdɔl.

20 Dza uwaga adà aṅha zla, ṅgaha adzəkà ma-pahay la makoray uwana sləm aṅha gudəṅ kulo, à tatak uwana Yesu adfahàləṅ gesina. Azladza gesina uwana tatsəb sləm à gay uwaga, gesina aṅatà, ləv avəl atà gay.

Dugu aṅa Yayrus atà la mis uwana adəbani lukut aṅa Yesu

(Mata 9.18-26; Luka 8.40-56)

21 Yesu awùl à waṅ la gay dərəv uda anik la kəslah iyaw. La mok uwana adatsizl à ahəṅ la gay mukwà, maham à ahəṅ dza aṅuvaw ahamàl à adi.

22 Məṅga aṅa gày Zəzagəla asà à waṅ, sləm aṅha Yayrus. Uwana anəṅəṅ Yesu akədèd à makəla asik aṅha.

23 Anàval, agòdɔl: “Bəzi dugu gulo azləmətsay. Kamkam, sà à waṅ, kabək ahàl à bəzi à vok kà masla mawur ala ṅgaha kà masla abəz sifa aṅha aya.”

24 Yesu asà à afik, tahàd atà səla, maham à ahəṅ dza aṅuvaw taṅisl Yesu.

25 Mis anik la ahəṅ la abatà, aṅiz akəllal à tsəh ala dagay mavakay kulo gəl aṅha səla.

²⁶ Aday vok mənğa la madàh à slaka azlaməna mavàh yohof, az ləmana aŋha ala kà aŋuvaw. Ama aga ŋuləm aw: say mavədzehəŋ ala pəra.

²⁷ Vərđi anik atsənàŋ tapəhay lakəl aŋa Yesu, kiya uwaga afà à vok à maham à ahəŋ dza à abà.

²⁸ Adzùgw la gəl aŋha: “Baŋa gədəbani lukut aŋha pəra kà, gədàwurla”, agòđ. Aguwa la lig aŋa Yesu, adəbani lukut aŋha.

²⁹ Batsàrà makəlay aŋiz aŋha atsìzl à ahəŋ, atapà vok aŋha kà adawur ala la đuvats aŋha la abà.

³⁰ La mok uwatà Yesu atapà kà ndzəđa asà à uda la vok aŋha. Agolà vok à maham à ahəŋ dza à abà la magòđay: “Uwa à uwana adəbani lukut gulo uwa?”

³¹ Azlaməna matapla la slaka aŋha tagòđal: “Nəŋà maham à ahəŋ dza taŋisl ka tsi, pəra kanav madəbiŋ ka aya ay?”

³² Yesu anəŋà à makəla gəl kà masəl dza uwana adəhà uwaga.

³³ Anasl adadiya à mis à vok kà uwana asəl uwana adəhà vok la masla. Asà à waŋ, atəđ à makəla asik aŋa Yesu, apəhal dziriga aŋha gesina.

³⁴ Yesu agòđal: “Dugu gulo, madiŋal gəl à vok aŋak awurà ka ala. Hàđ la wurwur, kadawurla la ŋərpa aŋak la abà!”

³⁵ Mok uwana Yesu apəh gay uwaga kà, azlaməna masləlay tasà à waŋ la mtəga aŋa Yayrus, mənğa aŋa gày madəv kudə, tagòđal: “Dugu aŋak kà adamətsay, kà mana katəřəb Sufəl aya ma?”

³⁶ Ama Yesu afà sləm à gay aṅatà aw, agòd à Yayrus: “Löv aval à kak à gay, kasak à madiṅal gəl à vok aw!”

³⁷ Avà tetəvi à dza kà malakəṅ aw, say Piyer, Yakuba la deda aṅha Yuhana pəra.

³⁸ Mok uwana abèz à mtəga aṅa mənḡa aṅa gày madəv kuḡa, Yesu atsənà hulolo aṅa azladza, la mataway, la mawiyay mənḡa.

³⁹ Yesu adà à gày, agòd à atà: “Kà mana kadzudəḡəkaw la mataway ma? Dugu uwanay kà, adamətsay aw, ama adzəhal pəra!”

⁴⁰ Uwana azladza tatsənà uwaga: “Uwàà...”, tasakwà à ahəṅ, takəḡàslal. Kà uwaga: “Dàw à uda gesina!”, agòd à atà. Say Baba la iyà aṅa dugu la azlaməna matapla la slaka aṅha makər uwatà pəra tagəḡ à gày. Uwana tahəd la gày uwana la aku tahənà dugu à agu.

⁴¹ Yesu akəs bəzi dugu la ahəl, agòḡal: “*Talitha koum*” (Bokuba magoḡay: Bəzi dugu sà à afik, gəgòḡ à ka)

⁴² Katskats bəzi dugu asà à afik, adzəkà maday. (Mavay aṅha kà kulo gəl aṅha səla) La mok uwana tanəṅà uwaga kà, löv avəl à atà à gay kaykay.

⁴³ Ama Yesu afàhà à atà akur à lig kà aṅuvaw, kà atà mapəh à dza anik aw. Nḡaha agòḡ à atà: “Vàwwal tatak may!”

6

Azlaməna gudəṅ Nazaret tadiṅ gəl à Yesu à vok aw

(Mata 13.53-58; Luka 4.16-30)

¹ Yesu azà vok la slaka uwatà, awùl à gudəŋ aŋha, uwana azigəŋ la abà. Azlaməna matapla la slaka aŋha tanəfà.

² Uwana vuɸ maduw ləv adasa à waŋ, adzəkà matapla tatak à azladza la gày madəv kuɸa la aku. Maham à ahəŋ dza aŋuvaw la abatà. Uwana tatsəbal sləm gesina kà, ləv avàl à atà à gay, tagòɸ: “Lala aɸəzà tsəhay gay uwanay la? Dzəɸa matsihila mana gà à uwanay aɸəzal ma? Kakay aɸehəŋ à tsəhay tatak dzəɸa aŋha səla aw gà uwanay ma?”

³ Dza uwanay kà masla mapəɸ kəslah aw takay? Kona aŋa Mariyama, ŋgaha deda aŋa Yakuba, la Yosəs, la Yahuda, la azla Səmon aw ay? Azladedda aŋha degagamga bay atà la uwanay anina la abanay aw takay?” Kà uwaga à uwana tadiŋal gəl à vok aw.

⁴ Yesu agòɸ à atà: “Tazləɸ masla mapəhal gay à ahəl aŋa Zəzagəla baməraka la mali, ama la gudəŋ aŋha kà tazləɸ masla aw, la tataka azlayaga aŋha la abà, azlaməna gày aŋha kà tazləɸay aw!”

⁵ Yesu aslàla vok kà maɸàh nadzipo la abatà dəŋ aw, say aɸək ahəl à azlaməna dʋvats anik à gəl ŋgaha awàr atà ala.

⁶ Ləv avàlal à gay kà uwana madiŋal gəl à vok aŋatà la ahəŋ aw.

Yesu asləl azlaməna matapla la slaka aŋha kulo gəl aŋha səla,

*la səla səla
(Mata 10.5-15; Luka 9.1-6)*

La lig la ahəŋ Yesu auguzàh la gudəŋ la abà gesina kà matapla gay Zəzagəla à azladza.

⁷ Yesu azàl azlaməna matapla la slaka aŋha kulo gəl aŋha səla, adzəkà masləl atà la səla səla, avà à atà maslay kà makor azlamasasəđok mawisiga.

⁸ Afàh à atà akur à lig, agòđ à atà: “Kazəbaw tatak à ahəl kà aŋa tetəvi aw, tatak may aw, kiwa aw, sili la zliba la aku aw, say azəva pəra.

⁹ Bèkàw kwimik à asik, ama katsəpaw lukut səla à vok aw!”

¹⁰ Agòđ à atà bay: “Baŋa kadaw à gudəŋ à abà kà, dzàw à ahəŋ la mtəga aŋa dza uwana akəs akul lela tsərəh à uwana kadaw aŋkul la abatà.

¹¹ Azladza gudəŋ uwana takəs akul aw, ŋgaha tatsən akul aw kà, kadaw aŋkul la abatà, dèđaw burburu la asik ala kà mapəh à atà ala kà tadfàh mawisiga.”

¹² Azlaməna matapla la slaka aŋha tahəd mapəh gay Zəzagəla, kà à azladza aŋa mapəh gay ləv ala, kà atà tasak à tsakana aŋatà.

¹³ Takuđəkàh azlamasasəđok mawisiga aŋuvaw, tadfahəŋ aməl à azlaməna đuvats à gəl, aŋuvaw tawàr ala.

*Mamətsay aŋa Yuhana masla mađfàh batem
(Mata 14.1-12; Luka 9.7-9)*

¹⁴ Sufəl Herod atsənà gay aŋa Yesu, kà uwana azladza tasəl sləm aŋha baməraka la mali, tagòđ: “Yuhana masla mađfàh batem adawul à uda, gay gə la uwaga aslàla vok aŋa mađfàh nadzipo”, tagòđ.

15 Azlaanik tagòd aya: “Uwaga kà Eliya”, azlaanik bay: “Uwaga masla maslèl à waṅ aṅa Zəzagəla bokuba tekula la tataka aṅa azlaməna mapəh à atà gay à ahàl uwana la abà uwarà”, tagòd.

16 Uwana Herod atsənà gay uwaga, agòd: “Uwaga Yuhana masla madàh batem uwana gəslèl dza kà manats gəl aṅha, masla la uwana adawul à uda la mamətsay.”

17 Kà uwana Herod la gəl aṅha apəh gay makəs Yuhana dagay uwarà, kà aṅa mawoɸəṅ à gày daṅay à agu. Adahàṅ kiya uwaga kà gay aṅa Herodiya, mis aṅa deda aṅha Filip, uwana Herod azəb.

18 Ama Yuhana agòd à Herod: “Uwaga kà delga aw, kà aṅa mazəb mis deda aṅak aw!”

19 Kà uwaga Herodiya apàk ləv lakəl aṅa Yuhana, ayàh kà makəɸ masla. Ama abəzà à tetəvi aw kà Herod.

20 Kà uwana guba azà Herod kà Yuhana, asəl kà masla dza dziriga ṅgaha sətaka gà, anəṅla masla lela, asəl matsən gay aṅa Yuhana, ama uwana adatsen gay aṅha gesina kà, haṅkəli aṅha awisa ala.

21 Mavakay delga aṅa Herodiya adasa à waṅ, uwaga mavakay aṅa mayyi Herod. Masla atà kaf à uda kà aṅa azlaməna aṅha, kà azlaməṅga aṅa azlaslodzi la azlaməṅga aṅa kutso Galili.

22 Bəzi dugu aṅa Herodiya adà à gày, ahàb dəs, arabà ləv aṅa Herod la azladza uwana tadzàh madzay atà nna. Sufəl Herod agòd à dahalay: “Mana asa à ka gəvə à ka ma? Nəv uwana asa à ka gesina, gəvə à ka”, agòɸal.

²³ Azùwal mawaday: “Uwana kanav à gi gesina gèwà à ka, amiyaka tenma aña makoray gulo bay.”

²⁴ Dahalay asà à uda, agòd à iyà aña: “Mana gènavay ma?” Agòdàl: “Nàval gèl aña Yuhana masla madàh batem.”

²⁵ Katskats amèrà vok kà mad à slaka sufèl, anàv la magoday: “Asa à gi kanèl gi gèl aña Yuhana masla madàh batem à tasà à abà.”

²⁶ Uwaga kà azà à sufèl la lèw mənɔga, ama kà mazuw mawaday aña uwana azùw la huma aña azladza kà, aslala vok kà makosal aw.

²⁷ Katskats sufèl aslèl slodzi kà manèl gèl aña Yuhana, kà aña masèlla à waɲ. Slodzi ahàd à gày daɲay à agu, anèl gèl aña Yuhana.

²⁸ Asèlla gèl aña Yuhana à waɲ la tasà la abà, avà à dahalay. Dahalay bay adàla à iyà aña.

²⁹ Mok uwana azlaməna asik aña Yuhana tatsèn uwaga, tasà à waɲ kà mazəb vok aña, kà malay.

*Yesu avà tatak may à azladza dəbow zlo
(Mata 14.13-21; Luka 9.10-17; Yuhana 6.1-14)*

³⁰ Azlaməna matapla la slaka aña tawùl à waɲ à slaka Yesu. Tapəhal uwana tadahàn, la uwana tatàpla à azladza.

³¹ Azladza aɲuvaw tasà à waɲ, aɲuvaw tadàn atà, kiya uwaga Yesu la azlaməna matapla la slaka aña tabəzà à tetəvi kà mazuw tatak may aw. Gay gà la uwaga Yesu agòd à atà: “Məhàd kokudà gami à fəta a abà, kà anu aña maduw lèw ɲuv.”

³² Tahàd la kèsлах iyaw kokudfa gəl aṇatà à fəta à abà.

³³ Ama azladza aṇuvaw tanəṇà atà à uwana taday, aṇuvaw tasəl atà. Tasàhà à uda la gudəṇ la abà gesina tamərà vok la asik ṅgaha tatsà vok à huma kà Yesu la azlaməna matapla la slaka aṇha.

³⁴ Uwana Yesu adasa à ahəṇ la kèsлах iyaw la afik kà, anəṇà azladza aṇuvaw. Vok ahàmal kà atà, kà uwana anəṇà atà kà bokuba azlatuwaṇ uwana masla manəṇla atà la ahəṇ aw. Adzəkà matapatàla tatak aṇuvaw.

³⁵ Uwana afats adatəđ à ahəṇ, azlaməna matapla aṇha tasà à waṇ à slaka aṇha tagòđal: “Afats adatəđ à ahəṇ ṅgaha uwanay bay kà anu la fəta.

³⁶ Wùlla azladza kà taday à bəza gudəṇ à abà la azlahuđ gudəṇ kà tasukw tatak may aṇatà.”

³⁷ Yesu awùlla à uda, agòđ à atà: “Akul vàw à atà tatak may tazuw!” Tagòđal: “Lala məbəz tatak may kà madzadzarla azladza kət uwanay la?”

³⁸ Yesu anàv atà: “Kaf ma katay aga la akul la ahəl ma? Dàw, kanəṇàwwàṇ!”

Uwana tanəṇəṇ uwaga: “Kaf gay bərsew zlo la kilfi səla.” tagòđal.

³⁹ Yesu agòđ à azlaməna matapla la slaka aṇha, kà azladza tadzàhà madzay la dzibokw dzibokw la kəsaf biyaga la afik.

⁴⁰ Tadzàhà madzay la dzibokw dzibokw, azlaanik dzim, azlaanik bay dzik zlo, dzik zlo.

⁴¹ Yesu ahəl kaf zlo la kilfi səla uwatà, anəṇà à zagəla, “Kikay”, agòđ à Zəzagəla, ṅgaha atsəkà

kaf ala, avà à azlaməna matapla la slaka aᅇha kà mavàh à azladza. Kiya uwaga ahəlla kilfi səla uwatà ala bay, tavàh à maham à ahəᅇ dza gesina.

⁴² Atà gesina tazùw, asläh atà.

⁴³ La lig la ahəᅇ azlaməna matapla la slaka aᅇha tahamà gay mapətsəh pətsəh aᅇa kaf uwana à vok atəmal à tsəh ala la kilfi səla uwatà, kà adahà takosà kulo gəl aᅇha səla.

⁴⁴ Matugway aᅇa azladza uwana tazùw kaf kà taslà zil dəbow zlo.

*Yesu aday lakəl dərəv məᅇga
(Mata 14.22-33; Yuhana 6.15-21)*

⁴⁵ Yesu afà à gay à azlaməna matapla aᅇha à gəl kà tadiyà à kəslah iyaw à afik kà matsəvokay kà masla à gay dərəv uda anik, nekwa la Betsayda, mok uwana: 'Dàw aᅇkul!', agodiyà à maham à ahəᅇ dza.

⁴⁶ La mok uwana tavàhla atà nna kà, Yesu adà aᅇha à gudəᅇ à afik kà madəv kudfa.

⁴⁷ Uwana vəd adasa à waᅇ, mok uwaga kəslah iyaw bay adabəzay à tataka iyaw à abà, ama Yesu aləg la vədah kokudfa gəl aᅇha.

⁴⁸ Anəᅇaᅇ azlaməna matapla la slaka aᅇha kà atà la ᅇgərpa la abà kà madla kəslah iyaw, kà uwana afad awùl à atà à adi. Uwana azlagay matuway gotsak, Yesu adà à awtày à slaka aᅇatà lakəl iyaw. Asal matsəvkay kà atà.

⁴⁹ Uwana tanəᅇaᅇ aday lakəl iyaw kà, atà tadzùgw kà tatak mavavat dza, tadzəkà mawiyay,

⁵⁰ Kà uwana atà gesina tanəjəŋ, ŋgaha guba akəs atà. Ama katskats Yesu abadətàmà, agòd à atà: “Wàdàw vok à uda, uwaga kà gi ŋwà!”

⁵¹ Ahàd à kəslah iyaw à afik la slaka aŋatà, afad akəsà à asik. Azlaməna matapla la slaka aŋha tahàn ala la madzugway məŋga, ləv avàl à atà à gay.

⁵² Kà uwana tasəl godega aŋa nadzipo aŋa kaf uwatà aw, kà uwana haŋkəli aŋatà aslà kà aŋa matsən godega aŋa tatak uwatà aw.

*Yesu awar azlaməna dʊvats ala la Genesaret
(Mata 14.34-36)*

⁵³ Uwana tadùw à uda à gay dərəv anik kà, tawàdà kəslah iyaw aŋatà à gay gərdza, tabèz à kutso aŋa Genesaret à abà.

⁵⁴ Mok uwana tasà à ahəŋ la kəslah iyaw la afik kà, katskats azladza tasəl Yesu.

⁵⁵ Tadàh à gudəŋ à abà la mahoyay, tadzəkà masàhla à waŋ azlaməna dʊvats la kəslah la slaka gesina.

⁵⁶ Bà kəla slaka uwana Yesu adà à abà, baməraka la azlaməŋ gudəŋ la abà, la azlabəzà gudəŋ la abà gesina azladza tasàhla azlaməna dʊvats aŋatà à waŋ à vadavaday kasukwa à afik, ŋgaha azlauwana tadəvəhal kudfa kà madəbani amiyaka gay aŋa lukut aŋha, tawàr ala.

7

*Matapla aŋa azlababa madzidzi gà
(Mata 15.1-9)*

¹ Azla Farisəya la azlaanik la tataka aŋa azlamadzahaga aŋa wakità seriya aŋa Zəzagəla la

abà tasà à waŋ à gudəŋ Urusalima, tahamà gay à vok la slaka Yesu.

² Tanəŋəŋ azlaanik la tataka azlaməna matapla aŋa Yesu la abà tazùw tatak may la kokufa matsuf manəfay aŋatà.

³ Kà uwana azà à azla Farisəya la azla Yahudiya gesina takəs lakəl aŋa matapla aŋa azlababa aŋatà madzidziga, tazùw tatak may kokufa mapal ahəl aw.

⁴ Baŋa tawùl à waŋ la kasukwa tazùw tatak may dàŋ aw, say baŋa tapəl vok lela. Takəs gay aŋa azlababa madzidziga kà məŋga. Uwana azlababa madzidziga tadfaħàhàŋ delga bokuba mapalal azlakətsaw, la azlamasik, la azlatasà vərzegani ŋgaha la kəslah mahən à afik aŋuvaw.

⁵ Azla Farisəya la azlamadzahaga aŋa wakità seriya aŋa Zəzagəla tanàv à Yesu: “Kà mana azlaməna matapla la slaka aŋak tatsùf gay aŋa azlababa gami madzidziga aw ma? Tazùw tatak la ahəl àlähga ma?”

⁶ Yesu awùlla à atà ala: “Hay! Azlayla masla mapəhal gay à ahəl aŋa Zəzagəla Yesayya asəl madzugway aŋkul lela. Akul azlaməna magolla dza, bokuba uwana tatsetsèr à wakità Zəzagəla à abà, Zəzagəla agòd:

'Azladza uwanay tazləb gi la gay pəra, ama ləv aŋatà kà kərkər la gi!

⁷ Tagòd kà, tawoya gi, ama gay aŋatà kà dey-day pəra, kà uwana tapàh mapəhay aŋa azlababa aŋatà kà bokuba mapəhay aŋa Zəzagəla.'”☆

☆ 7:7 7.7 Yesayya 29.13

⁸ Yesu agòd à atà: “Kasakaw à mapəhay aṅa Zəzagəla, ṅgaha kanəfaw matapla aṅa azladza!”

⁹ ṅgaha Yesu agòd à atà aya: “Hay, kasəlaw makweska gay makoray aṅa Zəzagəla kà makəs mapəhla ala aṅkul.

¹⁰ Musa agòd:

'Zlèbà baba aṅak la iyà aṅak. Dza uwana adfaha à atà mawisiga à vok, say makəday.'[☆]

¹¹ Ama akul kagodfaw kà: Baṅa dza agòd à baba aṅha baṅaw à iyà aṅha: ‘Tenma aṅa tatak gulo uwana asa à gi mav à ka kà mazlak kà, kà uwaga kà *Korban*.’ (Bokuba magodfay, tatak maviyàga à Zəzagəla)

¹² La lig la ahəṅ kasakaw dza uwana azlak baba baṅaw iyà aṅha dikiḍiki aya aw.

¹³ Kiya uwaga kawisèwwəṅ gay Zəzagəla ala la gay matapla aṅkul. Uwana kazàhəwwəṅ vok gesina, ṅgaha kapəkàw aṅkul ala kà gay Zəzagəla.”

*Azlatatak uwana tadàla àlàh à dza à vok
(Mata 15.10-20)*

¹⁴ La abatà Yesu azàla à maham à ahəṅ dza aya, agòd à atà: “Tsəbàw gi sləm gesina aṅkul, tsənàw gay uwanay”, agòd à atà,

¹⁵ “Tatak uwana dza azuway kà adfah àlàh à dza à vok aw, say uwana atsa à uda la ləv aṅa dza la tsəh la uwana adfah àlàh.

¹⁶ Tsənəwwəṅ lela, baṅa sləm aga à akul lakəl aṅa matsənəṅ!”

[☆] **7:10 7.10** 2Musa 20.12; 21.17; 5Musa 5.16

17 Mok uwana Yesu adasak à maham à ahəŋ, adà à gày, azlaməna matapla la slaka aŋha tanəval gay lakəl aŋa gay la gay la abà uwatà.

18 Ngaha Yesu agòd à atà: “Akul babay, kaslawwal à vok aŋa matsənəŋ aw ay? Tatak uwana adiya à huɸ aŋa dza atsa à uda aslala vok madfàh àlàh à dza à vok aw,

19 kà uwana adiya à ləv à tsəh aw, ad à huɸ, atsa à uda!” (La gay uwaga la abà Yesu apəh kà dèwdèw tatak may gesina kà, azuw vok)

20 Ngaha agòd à atà aya: “Uwana atsa à uda la ləv aŋa dza la tsəh la uwana adfàhla àlàh.

21 Kà uwana la ləv aŋa dza la uwana madzug-way mawisiga atsa à uda uwana adala dza à mabila à abà, mad gəl, makəɸ dza,

22 à gəl gaw, adi, maksafər, dəmɸem, maŋor, mapəh mawisiga lakəl aŋa dza anik, zlapay, masəl gəl aw.

23 Dèwdèw tatak mawisiga uwanay gesina atsa à uda la ləv aŋa dza la tsəh, uwaga la uwana adfàhla tsakana.”

*Yesu atà la mis uwana asəl Zəzagəla aw
(Mata 15.21-28)*

24 Ngaha Yesu atsizlla ala la abatà, ahàd à gay makwi aŋa gudəŋ Tir. Adà à gày anik à abà, asəl kà azladza tasəl slaka uwana masla la abà aw, ama aslala vok aŋa mahad vok à ahəŋ aw.

25 Mis anik uwana dugu aŋha la masasəɸok mawisiga lakəl atsənà gay lakəl aŋa Yesu. Katskats asà à waŋ à slaka aŋha, akədèɸal à makəla asik aŋha.

²⁶ Mis uwaga kà mëlök gâ, tayyà à gudəŋ Fenesəya uwana la kutso Səriya la abà. Adəv kuɗa à Yesu kà makudək masasəɗok mawisiga à dugu aŋha lakəl ala.

²⁷ Ama Yesu agòɗal: “Sàk azlabəza tahanla dadàŋ, mazəb tatak may aŋa azlabəza aŋa maməl à azlakəda à ahəŋ kà delga aw.”

²⁸ Mis awùlla à uda: “Sufəl gulo, azlakəda kà uwana la makəla kəsɗaf atəɗ kà azlabəza à wəɗah, la uwana tatsatsamay!”

²⁹ Yesu awulàlla: “Kà gay aŋak uwanay kà, dà aŋak à mtəga, masasəɗok mawisiga adasiya à dugu aŋak lakəl ala!”

³⁰ Awùl aŋha à mtəga, aɓəz à bəzi aŋha à gəl mahən à ahəŋ gâ la azlav la afik, masasəɗok mawisiga adasal à kəl ala.

Yesu awura dza bada gâ ala, ŋgaha madagazlam aya

³¹ Ŋgaha Yesu asà à uda la kutso aŋa Tir. Aguwà la Sədon, ŋgaha awùl à gay dərəv Galili, aguwà la makoray aŋa azlagudəŋ kulo la abà.

³² Tasàlla dza madagazlamga uwana à waŋ, aslala vok mabaɗma aw, tadəval kuɗa kà mabəkəl ahəl à gəl kà mawuriŋ ala.

³³ Yesu adàla à uda la tataka maham à ahəŋ dza la abà, atsizllàŋ à ahəŋ kokuɗa aŋha, adùwal gay gəl ahəl à sləm à abà, atəf sleslib à ahəl, adəbanì alàh aŋha.

³⁴ Anəŋà à zagəla, abàs vok la tsəh ala, agòɗ à dza: “*Ephphatha!*” (Bokuba magoɗay: Pèzlla à ama ala!)

³⁵ La kirim yewdi sləm aṅha asläh ala. Katskats tatak uwana awàdfla aläh à ahəṅ, apèzlla, abadma lela.

³⁶ Yesu afahà à atà akur à lig, kà tapèh à dza aw. Ama bà la mafàh à atà akur à lig, uwaga tapèh gesina.

³⁷ Ləv avàl à azladza à gay məṅga, tagòd: “Adfahan kà dzəḃa aṅha səla aw, adfahan kà azlamadagazlam aṅ matsən sləm, azlauwana taslala vok aṅ mabadma aw bay tabadma adagay!”

8

Yesu avà tatak may à zil dəbow ufad (Mata 15.32-39)

¹ La vud uwatà maham à ahəṅ dza aṅuvaw tahamà gay à vok aya la slaka Yesu. Uwana tatak may aṅatà la ahəṅ aw, Yesu azàla azlaməna matapla à slaka aṅha, agòd à atà:

² “Kay, vok aham à gi kà azladza uwanay, kà uwana anina dagay mahəṅay makər lagwa, tatak may aṅatà bay adadəv kà atà à gay.

³ Baṅa gəwulla atà à mtəga anatà la may gà kà, tadatad à ahəṅ la tetəvi la ama, kà uwana azlaanik kà tasà à waṅ kà kərker.”

⁴ Azlaməna matapla la slaka aṅha tagòdal: “Lala məbəz tatak may kà aṅ azladza gesina uwanay la kəsaf la abà la?”

⁵ Yesu anəv à atà gay ala: “Kaf gay bərsew nna aga à akul la ahəl ma?” “Gay bərsew mədəf”, tagòdal.

6 Yesu agòd à azladza: “Dzàhàw madzay!” Ngaha ahèl kaf gay bërsew mēdēf uwatà, “Kikay”, agòd à Zəzagəla, atsakà kaf ala, avà à azlaməna matapla la slaka aṅha, ṅgaha azlaməna matapla aṅha tavàhà à atà.

7 Kilfi bəziga la ahàl aṅatà aya, Yesu ahèl, “Kikay”, agòd à Zəzagəla, avà à azlaməna matapla la slaka aṅha kà mavàh à azladza.

8 Gesina aṅatà tazùw, aslāh à atà. Azlaməna matapla la slaka aṅha tahàm à gay mapətsèh pətsèhga à vok takosà mēdēf à uwana atàm à atà à ahàl.

9 Azladza uwana tazùw kaf uwaga taslà dəbow ufad. Ngaha adàgay kà: “Dàw à mtəga aṅkul!”, Yesu agòd à atà.

10 Katskats ahàd à kəslah iyaw à afik la azlaməna matapla la slaka aṅha, tahàd à kutso Dalmanuta.

*Azla Farisəya tanav nadzipo
(Mata 16.5-12)*

11 Azla Farisəya anik tadà à awtày, tadzəkà mabay vok gay la Yesu. Asà à atà makəsay, gay gà la uwaga tanāv nadzipo la slaka aṅha, kà mapəhatàla, ṅgaha atà aṅa masəlay kà ndzəḍa aṅha asà à waṅ kà la slaka Zəzagəla.

12 Yesu abàs vok la ndzəḍa, ṅgaha agòd: “Kà mana azladza aṅa lakana tanav à gi nadzipo ma? Gəpəh à akul la dziriga: Gədàpəhakulla nadzipo d̄ikid̄iki aw.”

13 Ngaha asàk atà à ahəṅ, ahàd à kəslah iyaw à afik aya, ahàd à gay məṅ dərəv anik.

Tatak makəsl tatak ala aṇa azla Farisəya la aṇa Herod

(Mata 16.5-12)

¹⁴ Avika azlaməna matapla aṇa Yesu kà mahəl kaf à ahəl. Tatak may la ahəṇ la slaka aṇatà la kəslah iyaw la afik aw, say kaf gay bərsəw tekula pəra.

¹⁵ Yesu afahà à atà akur à lig, agòd à atà: “Dàw haṅkəli kà tatak makəsl tatak ala aṇa azla Farisəya la aṇa Herod.”

¹⁶ Azlaməna matapla la slaka aṇha tavàts gay la tsəh ala kà atà kà atà la tataka aṇatà la abà, tagòd: “Apèh uwaga kà, kà uwana kaf aga anu la ahəl aw.”

¹⁷ Yesu asəl uwana tadzugway, anàv atà gay ala: “Kà mana kavatsaw gay la tsəh ala ma? Kà uwana kaf aga akul la ahəl aw ay? Kasəlaw tatak uwanay gotənaṇ aw uwà? Katsənaṇw godega aṇha aw, bə gotənaṇ ay? Matsihila aṅkul ma matsak à ama à gay ay?”

¹⁸ Yewdi aga à akul la vok, ama kanəṇawla aw ay? Sləm aga à akul lakəl, ama katsənaṇwla aw? Awul akul à gəl gotənaṇ aw ay?✧

¹⁹ Kaf gay bərsəw zlo uwana gətsàkəṇ ala kà aṇa azladza dəbow zlo, ma takosà nna à mapətsəh pətsəhga à uwana kahamàwla gay à vok ma?” “Kulo gəl aṇha səla”, tagòdal.

²⁰ Nḡaha Yesu anàv à atà gay ala aya: “Kaf gay bərsəw mədəf uwana gətsàkəṇ ala kà aṇa azladza dəbow ufaḍ bay, ma takosà nna à mapətsəh pətsəhga à uwana kahamàwla gay à vok ma?” “Mədəf”, tagòdal.

✧ **8:18 8.18** Yeremiya 5.21; Hezəkiyel 12.2

21 “La kità”, Yesu agòḍ à atà: “Kakay katsəṇaw godega aṅha aw gotəṇaṅ zlà ma?”

Yesu awur guləf ala la Betsayda

22 Uwana tabèz à gudəṅ Betsayda, tasàlla guləf à waṅ. Tadèval kuḍa kà aṅa madəbani guləf, kà masla mawur ala.

23 Yesu akəs guləf à ahàl, adàla à uda la gudəṅ la abà, ṅgaha adəbal slesliḥ à yewdi, abəkàl ahàl à gəl, ṅgaha anàv à dza uwaga: “Kanəṅa tatak ay?”

24 Guləf anəṅ à zagəla, agòḍal: “Gəṇaṅa azladza, ama gəṇəṅa atà kà bokuba azlaahàf uwana taday.”

25 Bà gotəṇaṅ, Yesu adəbani yewdi aṅa guləf aya. Masla atsək yewdi à uda la ndzəḍa, anəṅla, anəṅà azlatatak gesina la paraka.

26 ṅgaha la lig la ahəṅ, Yesu agòḍal kà: “Hàd à mtəga aṅak, kada à gudəṅ à abà aw!”

Piyer apəhla kà Yesu ala,

*kà dza uwana Zəzagəla afàl dzakwa à gəl
(Mata 16.13-20; Luka 9.18-21)*

27 La lig la ahəṅ, Yesu ahàd à azlabəza gudəṅ uwana à abà la kutso Zəsare, uwana la makoray aṅa Filip la azlaməna matapla la slaka aṅha. Yesu anàv à atà gay ala la tetəvi la ama: “Azladza ma uwa tagòḍ kà gi ma?”

28 Tawùlla à uda: “Azadza anik tagòḍ, kà kak Yuhana masla maḍàh batem, azlaanik tagòḍ, kà kak Eliya, azlaanik aya tagòḍ, kà kak tekula la tataka azladza uwana la abà, Zəzagəla asləl atà à waṅ uwarà.”

29 “Iyay zla! Ama akul ma, gi uwa kagodaw uwi?”, Yesu anàv à atà. Piyer awùl à uda, agòfal: “Kak, dza uwana Zèzagèla afà à ka dzakwa à gəl.”

30 Yesu afahà à atà akur à lig la magod à atà: “Kapèhawla gi ala la slaka azladza aw!”

Yesu apèh gay mamètsay anha à ahèj la mawul à uda anha

(Mata 16.21-28; Luka 9.22-27)

31 La lig la ahèj, Yesu adzèkà matapla azlamèna matapla la slaka anha: “Say Kona anja dza as ngèrpa mènja. Azlamènja, azlamasiga, la azlamèna mav tatak à Zèzagèla, la azlamadzahaga anja wakità seriya anja Zèzagèla tadàkweska, ngaha tadàkèda. La lig anja mahènyay makèr adàwul à uda la mamètsay.”

32 Apèh à atà gay uwaga la paraka. Piyer akès Yesu à ahèj kokudà anha, adzèkà mafahal akur à lig la magoday: “Kapèh kiya uwaga aw!”

33 Ama Yesu agolà à vok, anèjà azlamèna matapla anik à adi, ngaha adzèkà maslèh mël à Piyer à gəl, agòfal: “Zà à vok la slaka gulo, kak seteni, kà uwana madzugway anjak kà bokuba anja Zèzagèla aw, ama kiya anja azladza.”

34 Ngaha Yesu azal à maham à ahèj dza, la azlamèna matapla la slaka anha, agòd à atà: “Banja dza asal manèf gi kà, say asak maf gəl à azlatatak anha à tsèh, azèb ahèf mamètsay anha, ngaha anèf gi, bokuba uwana gèdàzèbay suwanj.

35 Kà uwana uwabeyuwi, uwana asal mafèl sifa anha la ahèl anha, az gəl anha ala. Ama

uwabeyuwi, uwana az sifa aṅha ala kà gi, ṅgaha kà gay matsidɔyga aṅa Zəzagəla kà, masla adàbəl sifa aṅha.

³⁶ Mana akəsa vok à dza uwana abəza tatak aṅa gudəṅ à vok gesina, ama az sifa aṅha ala ma?

³⁷ Tatak la ahəṅ, dza avà y kà masukwla sifa aṅha takay?

³⁸ Gay gà la uwaga, baṅa ziruwi az dza kà gi, ṅgaha kà gay gulo lakana la tataka azladza uwana takəs gay aṅa Zəzagəla aw la abà, ṅgaha tadəhəṅ mawisiga, kiya uwaga kà Kona aṅa dza ziruwi adəkəsəy kà masla suwaṅ, la mok uwana adàwul à waṅ la mazləbay aṅa Baba aṅha la abà la azlamalika aṅha.”

9

¹ Yesu agòf à atà aya: “Hadɔy, gəgòf à akul, azladza anik uwana la abanay kà, tadàmətsay dīkidīki aw, say baṅa tanəṅ makoray Zəzagəla atsa à waṅ la ndzəda.”

Mabəɖla vok à ahəṅ aṅa Yesu uwana la gəl gudəṅ la afik

(Mata 17.1-13; Luka 9.28-36)

² Uwana mahəṅay mukwa adada à lig, Yesu ahəl azla Piyer, Yakuba, Yuhana ṅgaha tahàd à matsəkəkadɔy gudəṅ à afik kokuda gəl aṅatà. La abatà abəɖla vok à ahəṅ la huma yewdi aṅatà.

³ Lukut aṅha apàk medekuga mawutsəɖayga təlla. Dza la ahəṅ la gudəṅ la vok awud lukut ala kiya uwatà aw.

4 Ngaha azlamèna matapla la slaka aṅha makèr uwatà tanəṅà Eliya la Musa tabadma la Yesu.

5 Piyer agòd à Yesu: “Sufèl gulo, delga kà anu la abanay. Sàk anu mədàh safsaf makèr, tekula aṅak, tekula aṅa Musa, tekula aṅa Eliya.”

6 Piyer asèl tatak uwana anakà apəhay aw, kà uwana guba akès masla la azlamèna matapla anik sèla uwanay.

7 Habaga asà à waṅ, akèl atà mələs à adi. La habaga uwatà la abà kà tatsənà dza aḃadma la abà: “Uwaga kà bəzi gay ləv gulo uwana gəwoyaṅ, tsəbàwal sləm!”

8 Katskats azlamèna matapla makèr uwatà tanəṅla, ama tanəṅà dza aw, say Yesu kokuḃa gəl aṅha la slaka aṅatà pəra.

9 Uwana tatsà à ahəṅ la gudəṅ la afik, Yesu afàh à atà akur à lig kà atà aṅa mapəh tatak uwana tanəṅəṅ à dza aw, say baṅa Kona aṅa dza adàwul à uda la mamətsay dadəṅ.

10 Takès gay uwatà, ama tanàvəhà vok kà atà kà atà: “Mana asal magoḃay mawul à uda la mamətsay ma?”

11 Gay gà la uwaga tanəv la slaka Yesu: “Kà mana à azlamadzahaga aṅa wakità seriya Zəzagəla tagòḃ kà, say Eliya atsa à vok à waṅ dən ma?”[☆]

12 Agòd à atà: “La dziriga, say Eliya atsa à vok à waṅ, adàḃah tatak à ahəṅ gesina. Ama kà mana zlà ma tatsetsèr à wakità Zəzagəla à abà bay kà, say Kona aṅa dza as ṅərpə mənḡa ma, ṅaha azladza tanərəz kà bokuba dza delga aw ma?”

☆ 9:11 9.11 Malaki 4.5

13 Ama gəgòf à akul: Eliya asà à waŋ, ŋgaha azladza tadhàllàn à vok uwana asà à atà gesina, bokuba uwana tatsèr à wakità Zəzagəla à abà lakəl aŋha.”

Yesu awur bəzi uwana ala la masasəfok mawisiga

(Mata 17.14-21; Luka 9.37-43)

14 Mok uwana tabəziyà à azlaməna matapla anik à vok, tanəŋà maham à ahəŋ dza aŋuvaw uwana takəs atà gay à adi. Azlamadzahaga aŋa wakità seriya aŋa Zəzagəla tabəy vok à gay la azlaməna matapla aŋha.

15 Uwana azladza tanəŋà Yesu kà, tadhà à ahəŋ titi. Katskats tadà à awtəy à slaka aŋha la mahoyay kà maskuwiŋ.

16 Yesu anəv à azlaməna matapla la slaka aŋha la gay ala: “Kà mana kabayaw vok gay akul nna ma?”

17 Dza tekula la tataka maham à ahəŋ dza la abà awùlalla: “Məŋga, gəsàla bəzi gulo zilga à waŋ, kà uwana masla la masasəfok uwana avəl tetəvi aŋa mabədma aw.

18 Bamərakə la mali beli masasəfok akəsàh, amələl gəl à ahəŋ, huzləv asàhal à gay ala la mapad slid la tsəh ala. Vok aŋha apakahay dzaŋ-dzaŋ. Gədəv kudfa à azlaməna matapla la slaka aŋak kà makudək masasəfok mawisiga uwaga, ama taslala vok aw.”

19 Yesu agòf à atà: “Kay, madiŋal gəl à vok aŋkul la ahəŋ aw takay? Dagay mbà gədadza à ahəŋ la akul ma? Dəgay mbà gədəbasakulan ma? Səwgəla bəzi à waŋ!”

20 Tasëlla bëzi à slaka Yesu, mok uwana bëzi adanëj Yesu, katskats masasëdök abiyà bëzi, atëd à vëdah, abàbal, huzlöv asàl à gay ala.

21 Yesu anàv à baba aña bëzi: “Dagay mbà tatak uwanay azëj ma?” Baba agòdal: “Dagay la vërnaga.

22 Añuvaw masasëdök mawisiga uwaga amà-làhal à gël akàl à abà, à iyaw à abà kà makëdäy. Ama kamkam, baña kaslala vok mazlak anu, kà vok aham à ka, kà anu!”

23 Yesu agòdal: “Kà mana kagodf kà: Baña kaslala vok ma? Dza uwana adiñal gël à vok aslala vok kà madàh tatak gesina.”

24 Katskats baba aña bëzi awiyà: “Gëdiñal gël à vok, ama zlàk à gi, kà uwana madiñal gël à vok gulo kà à tsëh ala!”

25 Yesu anëj à maham à ahëj dza tatsà à waj à slaka anatà, aslëh mël à masasëdök uwana à gël, adëd gay à dza à ahëj aña mabadma la matsën slëm: “Kak, masasëdök madagazlamga, sà à dza uwanay lakël ala, gëgodf à ka, kadàdal à gël diki-diki aya aw!”

26 Masasëdök awiyà, agodzàlla bëzi, asà à uda la masla la abà. Bëzi apàk bokuba mamëtsayga. Kiya uwaga azladza añuvaw uwana la abatà tagòd kà adamëtsay.

27 Ama Yesu akës bëzi la ahàl, atsizllàn ala, dzawwa bëzi agëd à zagëla à tsëh.

28 La lig la ahëj, mok uwana Yesu adawul à gày, azlamëna matapla la slaka aña tanàvla gël à gël: “Kà mana anu kà, mëslàla vok aña makudëkay aw ma?”

29 Yesu agòd à atà: “Makudək tsəhay masasədok uwanay kà, say la madəv kufa. Ndzəfa anik la ahəŋ aw.”

Yesu apəh à atà gay mamətsay aŋha

*la mawul à uda aŋha kà masəla
(Mata 17.22-23; Luka 9.43-45)*

30 Tadà aŋatà la abatà, taguwà à uda la kutso Galili la abà. Yesu kà asəl kà dza asəl slaka madz à ahəŋ aŋha aw,

31 kà uwana atapələ azlaməna matapla la slaka aŋha, agòd à atà: “Kona aŋa dza tadəviya à ahəl aŋa azladza. Atà tadəkəfay, ama la lig la ahəŋ gədàwul à uda la mamətsay la mahəney makər.”

32 Azlaməna matapla la slaka aŋha tatsənà godega aŋa gay uwatà aw, ŋgaha guba akəs atà bay kà manaval.

*Məŋga la tataka gami la abà, ma zlà uwa?
(Mata 17.22-23; Luka 9.46-48)*

33 Tabèz à gudəŋ Kapernahum. Uwana tadà à gày, Yesu anàv à azlaməna matapla la slaka aŋha: “Kà mana kabàyaw vok gay la tetəvi la ama ma?”

34 Ama tadzà à ahəŋ titi, kà uwana la tetəvi la ama kà, tabayà à vok à gay haday, tagòd: “Uwa məŋga la tataka gami la abà uwa?”

35 Yesu adzà madzay, azəl azlaməna matapla la slaka aŋha kulo gəl aŋha səla, agòd à atà: “Baŋa dza asal mapak mazəb gəl gà kà, say apak mabəziga bəziga aŋa azladza gesina, apak masla mazəb à atà kiwa.”

³⁶ Yesu azèb bëzi ñuvga à ahàl, atsizilla atà à huma à gay. Akès bëzi la ahàl, agòd à azlamèna matapla la slaka aṅha:

³⁷ “Uwabeyuwi uwana akès bëzi ñuvga uwanay kà slèm gulo kà, akès gi. Nḡaha uwabeyuwi uwana akès gi kà, akès gi pèra aw, ama akès masla maslèl gi à waṅ.”

Dza uwana masla mēzam gami aw kà masla slawda gami

(Luka 9.49-50)

³⁸ Yuhana agòd à Yesu: “Sufèl gulo, mènəṅà dza anik uwana akudèk masasèdok mawisiga la slèm aṅak, ama mèdeḏal gay à ahəṅ, kà uwana anəfà anu aw.”

³⁹ Ama Yesu agòd à atà: “Kadefawwal gay à ahəṅ aw, kà uwana dza la ahəṅ adàh nadzipo la slèm gulo pèra, la lig la ahəṅ kà, atugw à gi gay à vok aw.

⁴⁰ Kà uwana uwabeyuwi uwana masla mēzam gami aw, kà slawda gami.

⁴¹ Sèlàw kà, dza uwana adàvà à akul kətsaw iyaw, kà uwana akul aṅa dza uwana Zəzagəla afàl dzakwa à gəl kà, adàbèz à masik aṅha.”

Gay lakəl aṅa zlazladà aṅa tsakana

(Mata 18.6-9; Luka 17.1-2)

⁴² “Dza uwana adukw tekula aṅa azlabəza uwanay à ahəṅ à tsakana à abà, tadinḡ gi gəl à vok kà, masla kà ṅuləm tawadàl nəvol akur à kuda, taməla à dərəv à abà.

⁴³ Baṅa kà ahàl aṅak la uwana katəḏ à tsakana à abà, nàts à tsəh ala, ṅuləm kà kabèz à sifa la ahàl tekula, kà magay la ahàl sèla nna, uwana

adàdala kà à gày akàl uwana à abà adàmòts ala aw. ((

⁴⁴ La abatà maduwari uwana azuw vok amòtsay aw, ñgaha akàl bay amats ala aw.))

⁴⁵ Baṅa kà asik aṅak la uwana katəfiya à tsakana à abà kà, nàts à tsəh ala. Njələm kabəz à sifa la asik tekula, kà mad à gudùh akàl à abà la asik sèla nna, uwana amats ala ðikidiki aw. ((

⁴⁶ La abatà maduwari uwana azuw vok adàmòtsay aw, ñgaha akàl amats ala aw.))

⁴⁷ Baṅa kà yewdi aṅak la uwana adala ka à tsakana à abà, bə̀ɸ à waṅ, njələm kabəz à sifa la yewdi tekula gà à ka magay la yewdi sèla kà madiya à gudùh akàl à abà.

⁴⁸ La abatà maduwari uwana azuw vok adàmòtsay aw, ñgaha akàl la abà kà madzad atà ala adàmats ala aw.*

⁴⁹ Kà uwana dza gesina tadətəka atà slugul à adi la akàl, bokuba uwana tatək slugul à tatak à adi kà matsedəṅ.”

⁵⁰ “Kà uwana slugul kà tatak delga, ama baṅa slugul azladfay aw, ma kakay kazladawwan ala ma? Gàw la slugul la ləv aṅkul la tsəh, dzàw à ahəṅ la wurwur, kadahawa à magazlay la tataka aṅkul la abà aw!”

10

*Yesu apahla gay ala lakəl aṅa makudək mis
(Mata 19.1-12; Luka 16.18)*

¹ Yesu asà à afik la abatà, ahàd à gay makwi aṅa kutso Yahudiya la gay dərəv uda anik aṅa Urdun. Bà gotənaṅ maham à ahəṅ dza tahamà

* 9:48 9.48 Yesayya 66.24

gay à vok la slaka aṅha aya. Nḡaha atàpatàla bokuba uwana adahàhàn koksikoksi.

² Azla Farisəya anik tasà à waṅ à slaka Yesu, asà à atà kà makəsəl maləkaw à ahəṅ kà gay aṅha: “Wakità seriya gami ma avà tetəvi à dza kà makudək mis aṅha takay?”

³ Yesu awùlla à atà ala la magoḡay: “Mana Musa agoḡ à akul ma?”

⁴ Tagòḡal: “Musa avà tetəvi à dza kà matsetser wakità makudək mis, ṅaha məsakiya à mis uwatà.”✧

⁵ Ama Yesu agòḡ à atà: “Musa apèh à akul kiya uwatà kà, kà dzaṅdzaṅ aṅa ləv aṅkul.

⁶ Ama dagay madzəka guḡəṅ à vok, mok uwana Zəzagəla adahà tatak gesina kà, aṅəl zil la mis pəra.✧

⁷ Gay gə la uwaga zil asàkiyà à baba aṅha à ahəṅ la iyà aṅha, kà madz à ahəṅ la mis aṅha.

⁸ Atà səla nna tapək vok tekula. Kiya uwaga atà səla aya aw, ama tagay kà vok tekula pəra.✧

⁹ Dza avahəṅ ala uwana Zəzagəla ahamàla gay à vok aw.”

¹⁰ Mok uwana atà la kay, azlaməna matapla la slaka aṅha tanàvə Yesu lakəl aṅa gay uwatà aya.

¹¹ Masla agòḡ à atà: “Baṅa dza akudək mis aṅha, azəb anik, adàh à gəl gaw la mis teraṅa gə uwatà.

¹² La kità babay kà, baṅa mis akweska zil aṅha teraṅa, ṅaha adiya à zil anik, adàzaḡ zil.”

✧ **10:4 10.4** 5Musa 24.1-4 ✧ **10:6 10.6** 1Musa 1.27; 5.2 ✧ **10:8 10.8** 1Musa 2.24

*Yesu apis gay à azlabəza à vok
(Mata 19.13-15; Luka 18.15-17)*

¹³ Azladza tasàhla azlabəza nıv nıgvga à Yesu à waŋ, kà madəbani atà la mapis à atà gay à vok. Azlaməna matapla la slaka aŋha tasläh məl à azladza à gəl.

¹⁴ Uwana Yesu anəŋà uwaga, azinal à gəl, agòd à azlaməna matapla la slaka aŋha: “Sàkàw azlabəza nıv nıvga tasa à waŋ à slaka gulo. Kadədaw atà gay à ahəŋ aw, kà uwana makoray Zəzagəla kà aŋa azladza uwana bokuba atà uwaga.

¹⁵ Haday, gəgodf à akul: Uwabeyuwi uwana akəs makoray Zəzagəla bokuba bəzi nıvga aw, adàda à abatà dıkidiki aw.”

¹⁶ Ngaha azàb azlabəza à ahəl, afahà à atà ahəl aŋha à gəl, la tekula tekula aŋatà gesina, apis à atà gay à vok.

*Bəzi kohana galepi gà
(Mata 19.16-30; Luka 18.18-30)*

¹⁷ Uwana Yesu adatsizlla kà maday aŋha, dza anik asà à waŋ la mahoyay, akədédal à ahəŋ, agòdal: “Kak Sufəl, kak delga, mana gədehəŋ kà gi aŋa məbəz sifa adəv à gay aw ma?”

¹⁸ Yesu agòdal: “Kà mana kagodf, kà gi delga ma? Dza delga la ahəŋ aw, say Zəzagəla pəra.

¹⁹ Kasəl mapəhay aŋa Zəzagəla bay: Kakədf dza aw, kəs gay aŋa azlababa aŋak la aŋa iyà aŋak.”✧

²⁰ Masla agòd: “Məŋga, gədakəs mapəhay uwaga dagay la bəzi gà.”

✧ 10:19 10.19 2Musa 10.12-16; 5Musa 5.16-20

21 Yesu anèrèz masla la mawoyəŋ, agòɖal: “Tatak tekula aləg kà ka: Hàd, kadaw azlatatak aŋak ala gesina, v àh sili g à azlaməna kudà, kadàbèz ləmana la zagəla la afik. Ngaha kà, s à à waŋ, kà nəfà à gi!”

22 Ama uwana atsənà uwaga, ləv azəŋ kà gay uwatà, ngaha adà aŋha la mapak ləv g à, kà uwana tatak aŋha aŋuvaw.

23 Yesu anəŋà azlaməna matapla la slaka aŋha à adi, agòɖ à atà: “Zlazladà kà aŋa dza galepi kà mad à makoray Zəzagəla!”

24 Ləv avàl à atà à gay kà gay uwaga. Ama Yesu agòɖ à atà aya: “Azlabəza gulo, madiya à makoray Zəzagəla kà zlazladà!”

25 Nuləm zlugumi agwu à uda la afik lepiri, kà galepi aŋa mad à makoray Zəzagəla.”

26 Ləv avàl à azlaməna matapla aŋha à gay kayak aya kà gay uwaga, tagòɖ kà atà kà atà: “Tsa baŋa kiya uwaga ma: Uwa aslala vok aŋa mabəlay uwa?”

27 Yesu anəŋà à atà à adi, agòɖ: “Zlazladà la slaka azladza, ama la slaka Zəzagəla kà zlazladà aw, kà uwana masla aslala vok kà madàh tatak gesina.”

28 Piyer agòɖal: “Nəŋàŋ, mədasak à tatak gesina à ahəŋ, mədanəfa kà.”

29 Yesu agòɖal: “Dziriga, gi bay gəgòɖ à akul: Uwabeyuwi uwana asakiya g ày aŋha à ahəŋ, baŋaw azladedà aŋha, la azlaiyà aŋha, la azlababa aŋha, baŋaw azlabəza aŋha à ahəŋ, amiyaka guf aŋha kà gi, ngaha kà gay matsi-ɖayga kà,

³⁰ Zəzagəla adàvəl, adàbəz tatak aṅha asik dzim aya, la mok aṅa madz à ahəṅ la gudəṅ la vok: azlagày, azladedə, azlaiyà, azlabəza, azlaguf, azlamətərəbay bay, kà la huma la gay, adàbəzal sifa adəv à gay aw la zagəla la afik aya.

³¹ Ama aṅuvaw uwana tatsà vok à huma, tadàpakah azlaməna à lig, ṅgaha azlaməna à lig bay tadàpakah azlaməna à huma.”

Yesu awulla gay mamətsay aṅha à tsəh kà maməkər

la mawul à uda aṅha

(Mata 20.17-19; Luka 18.31-34)

³² Uwana atà la tetəvi la ama kà mad à Urusàlima, Yesu aguwà à huma, guba akəs azlaməna matapla la slaka aṅha, azladza uwana tanəfà atà guba akəs atà babay. ṅgaha Yesu ahəl azlaməna matapla kulo gəl aṅha səla uwatà aya, kokudə aṅatà, adzəkà mapəh à atà gay uwana adàbəzal.

³³ Agòd à atà: “Tsənàwwàṅ, məda à Urusàlima. La abatà tadàvə Kona aṅa dza à ahəl aṅa azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla. Tadàdukwlə seriya mamətsay à gəl, tadàməliya à ahəl aṅa azladza uwana tasəl Zəzagəla aw.

³⁴ Tadàtsəkəl magodəhay à gəl, tadàtafal slesliḃ à vok, tadàzlabay la golba, tadəkədfay. Ama la mahəṅay maməkər adàwul à uda la mamətsay.”

Manavay aṅa Yakuba la Yuhana

(Mata 20.20-28)

³⁵ La lig la ahəŋ Yakuba la Yuhana, azlabəza aŋa Zebede, tazà vok à slaka Yesu, tagòfal: “Məŋga gami, tatak la ahəŋ à uwana mənava à gay ala.”

³⁶ Yesu agòd à atà: “Mana asa à akul gədfaha-kullan ma?”

³⁷ Tawulàlla: “Baŋa kadàdza madzay la kursi mazləbay aŋak la afik kà, vā à anu tetəvi kà madza madzay tekula la ahəl kaf aŋak ŋaha tekula la ahəl gudzay aŋak!”

³⁸ Yesu agòd à atà: “Kasəlaw tatak uwana kanavaw aw, kaslawwal à vok kà mas tatak à uda la kətsaw ŋərpa uwana la abà gədàsay ay? Kadàbəzaw batem aŋa ŋərpa uwana tadəcfah gi à ahəŋ ay?”

³⁹ Ŋaha tawulàlla: “Iyay, məslala vok.” Yesu agòd à atà: “Hadəy, kadàsaw tatak à uda la kətsaw ŋərpa uwana la abà bokuba gi, kadàbəzaw batem uwana tadəcfahgəŋ bay.

⁴⁰ Ama slaka madza madzay la ahəl kaf gulo ŋaha la ahəl gudzay gulo kà, gay gulo aw. Slaka uwaga kà, Zəzagəla la uwana adəhanə à ahəŋ kà aŋa azladza uwana atsatsəmàni à atà.”

⁴¹ Uwana azlaməna matapla anik kulo tatsən gay uwaga kà, taŋonjuz lakəl aŋa Yakuba atà la Yuhana.

⁴² Gay gà la uwaga Yesu azəl à atà gesina à slaka aŋha, agòd à atà: “Kasəlaw kà azlawana tanəŋla à atà bokuba azlasufəl aŋa kutso kà takor azladza, ŋaha azlaməŋ dza aŋatà, tadəfa à atà ndzəda à gəl.

⁴³ Ama uwaga apaka vok la tataka aŋkul la abà aw. Ama baŋa tekula la tataka aŋkul la abà asal

mapak mənğa kà, say agay masla mazəb kiwa à azlaanik.

⁴⁴ Dza uwana asal mapak dza teraŋa gà la tataka aŋkul la abà kà, say apak mayà aŋa azlaanik aŋkul gesina.

⁴⁵ Amiyaka Kona aŋa dza kà, asà à waŋ kà mazlakəŋ aŋa azladza aw, ama asà à waŋ kà mazlak azladza, ŋgaha kà mav sifa aŋha bokuba tatak mapəlla gəl à azladza aŋuvaw à ahəŋ.”

*Yesu awur Bartime guləf ala
(Mata 20.29-34; Luka 18.35-43)*

⁴⁶ Uwana tabəz à gudəŋ Yeriko, Yesu la azlaməna matapla aŋha la maham à ahəŋ dza aŋuvaw tasà à uda la gudəŋ uwatà la abà. Dza guləfga la slaka madza madzay la gay tetəvi atsàtsàh tatak. Sləm aŋha Bartime, kona aŋa Time.

⁴⁷ Uwana atsənəŋ kà Yesu zil Nazaret la uwana adà à awtəy kà, adzəkà mawiyay: “Yesu, Kona aŋa David, vok aham à kak kà gi!”

⁴⁸ Azladza aŋuvaw taslàhal məl à gəl kà madz à ahəŋ titi, ama masla awiyà la ndzəfa aya: “Kona aŋa David, vok aham à kak kà gi!”

⁴⁹ Yesu atsizlla à ahəŋ, agòd: “Zàlàwwal!” Tazàlalla, tagòdal: “Wədf vok à uda, sà à afik, azàla ka!”

⁵⁰ Ŋgaha guləf awits peteli ala, avàl à afik, asà à waŋ à slaka Yesu.

⁵¹ Yesu anàval la gay ala: “Mana asa à ka gədahakan ma?” Guləf agòdal: “Mənğa, asa à gi gəbəz yewdi gulo.”

⁵² Ngaha Yesu agòfal: “Hàd, madiṅal gəl à vok aṅak adawur kak ala!” Katskats abəzà à yewdi aṅha, anəfà Yesu.

11

*Yesu adiya à gudəṅ Urusalima à abà
(Mata 21.1-11; Luka 19.28-40; Yuhana 12.12-19)*

¹ Mok uwana atà nekwa la Urusalima, bokuba la bəza gudəṅ Betfaze la Betaniya, tabəzà à gudəṅ kuvu à afik. (Uwana tazalalla la gay nasara gudəṅ Oliviyə) Yesu asləl azlaməna mat-apla aṅha səla à huma, agòf à atà:

² “Dàw à gudəṅ uwaga à abà la huma aṅkul. Kadəbəzaw à ziwṅṅu ṅuvga mawadəṅ à ahəṅ gə uwana dza adadza à afik dīkidiki aw. Pèlāw, kasawgəla à waṅ!

³ Baṅa dza agòf à akul: ‘Mana kadəhawlan mi?’, kagofawwal: ‘Asa à Sufəl gami, adəullàlla à waṅ katskats’.”

⁴ Tahàd, tabəzà à ziwṅṅu mawadəṅ à ahəṅ gə à gəl la gay gamagày, la gay tetəvi. Uwana tapəl ziwṅṅu uwatà kà,

⁵ azladza anik uwana la abatà, tanəv à atà gay ala: “Mana kadəhawlan ma? Kà aṅa ma kapəlaw bəzi ziwṅṅu uwaga ma?”

⁶ Tawùl ala bokuba uwana Yesu apəh à atà, ṅgaha azladza tasàk atà.

⁷ Tasəlla bəzi ziwṅṅu uwatà à Yesu à waṅ, tabəkəkal lukut aṅatà à lig, ṅgaha Yesu adà à afik.

⁸ Azladza aṅuvaw tadàw lukut aṅatà à tetøvi à ama, azlaanik tatsàd babasl biyaga uwana la guf la abà, taslàh à tetøvi à ama kà maslækaway.

⁹ Azlauwana la huma aṅa Yesu, la azlauwana tanəfay la tsəh, tawiyà la magodəy: “Delga kà azladza tazləb Zəzagəla, mapis gay à vok agay la dza uwana atsà à waṅ la sləm aṅa Sufəl.✧

¹⁰ Zəzagəla apis gay à makoray aṅa baba gami David à vok, uwana adadzəka vok lagwa. Məzləbà Zəzagəla uwana la zagəla la afik kərkər!”

¹¹ Kiya uwaga Yesu ahàd à gudəṅ Urusalima, kà mad à gəy Zəzagəla à agu, ananà azlatatak gesina lela. Uwana gay mokokhu adagay, ahàd à gudəṅ Betaniya la azlaməna matapla aṅha kulo gəl aṅha səla uwatà.

*Yesu atsafla gudəv
(Mata 21.18-19)*

¹² Lebəṅ gə, uwana tasà à uda la gudəṅ Beta-niya, may akəs Yesu.

¹³ Anəṅà gudəv la babasl la vok, ṅgaha ahàd kà mayàh mayyay la vok aṅha. Ama uwana adabəziya à tsəh aṅha kà, abəzà mayyay la vok aṅha aw, say babasl pəra, kà uwana kaslà aṅa gudəv dadəṅ aw.

¹⁴ Yesu agòd à gudəv: “Dza adəzuw mayyay la vok aṅak aṅa tetuwa aya aw!”

Azlaməna matapla la slaka aṅha tatsənà gay uwaga.

✧ 11:9 11.9 Mahabay 118.25-26

Yesu akudəkàh azlaməna tsakalay à lag la gày Zəzagəla la aku

(Mata 21.12-17; Luka 19.45-48; Yuhana 2.13-22)

¹⁵ Uwana tabèz à Urusalima, Yesu ahàd à mən gày Zəzagəla à agu. Adzəkà makudəkàh azlaməna tsakalay à uda, la azlaməna masukw tatak la gày Zəzagəla la aku. Adakwà azlatable aṅa azlaməna mabadfla sili à ahəṅ la azlaslaka madza madzay aṅa azlaməna madaw habakoku ala.

¹⁶ Asà kà dza baməraka tekula aṅa mad à gày Zəzagəla à agu la tatak lakəl aw.

¹⁷ Atapla tatak à azladza, agòd: “Aganay uwana tatsetsèr à wakità à abà, Zəzagəla agòd: ‘Sləm aṅa gày gulo kà uwaga gày madəv kuḏa aṅa azladza gudəṅ à vok gesina. Ama akul kà, kadapakawwan aṅa bokuba tsakur aṅa azlaməna gəl.’”✧

¹⁸ Azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla tatsənà gay uwatà. Gay gà la uwaga tayàh Yesu kà maziṅ ala. Ama guba akès atà kà masla, kà uwana ləv avəl à azladza à gay gesina kà gay aṅha.

¹⁹ Uwana mokokhu adasa à wan, Yesu la azlaməna matapla la slaka aṅha, tasà à uda la gudəṅ la abà.

*Gay lakəl aṅa gudəv uwana agul afik
(Mata 21.20-22)*

²⁰ La gay bebəŋ bəŋ uwana tadùw à awtày la abatà, tanəŋà gudəv uwatà aya, adagul à afik la slilih gà gesina.

²¹ Awùl à Piyer à gəl, agòd à Yesu: “Məŋga gulo, nəŋà gudəv uwana katsàfla, kà adagul à afik tsi!”

²² Yesu awùlla à atà ala: “Haday, gəgòd à akul, baŋa kadiŋaw gəl à Zəzagəla à vok kà,

²³ kaslawwal à vok aŋa magoday à gudəŋ uwanay: Zà vok la abanay, tsà gəl à dərəv à abà. Baŋa kadzurkaw la ləv aŋkul la tsəh aw, kadiŋawwal gəl à vok la ləv aŋkul la tsəh kà, uwaga adàpakakulla vok haday.

²⁴ Gay gà la uwaga gəgòd à akul, baŋa kadəvaw kudà kà manav tatak anik la sləm gulo kà, diŋàwwal gəl à vok kà kadabəzawwal, ŋgaha tadàvəkulla.

²⁵ Mok uwana katsizlàwla kà madəv kudà kà, baŋa gay la ahəŋ la ləv aŋkul la tsəh la dza anik kà, matsalaŋ mawisiga aŋha ala ŋgaha Baba aŋkul, uwana la zagəla la afik amatsakulaŋ ala bay. ((

²⁶ Ama baŋa kamatsawwaŋ azladza anik ala aw kà, Baba aŋkul uwana la zagəla la afik adà-matsakulaŋ ala bay aw.))”

Uwa avà maslay à Yesu uwà?

(Mata 21.23-27; Luka 20.1-8)

²⁷ Tawùl à Urusalima aya. Mok uwana Yesu auguzahay la gày Zəzagəla la aku kà, azlaməŋga aŋa azlaməna mav tatak à Zəzagəla, la azlamadzahaga aŋa wakità seriya aŋa Zəzagəla, la azlamasiga tasà à waŋ à slaka Yesu.

28 Tanàv à Yesu la gay ala: “La maslay ma uwala kadàh sləray uwanay la? Uwa avà à ka tetəvi kà madàh sləray uwanay uwa?”

29 Yesu awùlla à atà ala: “Gi bay, gənav à akul manavay tekula. Baṇa kawulawgəla, gi bay gədàpəhakulla maslay uwana gəfàhla sləray.

30 Uwa avà tetəvi à Yuhana kà madàh batem uwa? Zəzagəla ay? Awma azladza takay? Wùlàwgəla!”

31 Ama takəs sawaray kà atà kà atà, tagòd: “Baṇa mөгod kà: Zəzagəla la uwana avà tetəvi kà, adàgod à anu: Ka mana kadiṇawwal gəl à vok aw zlà ma?”

32 Ama baṇa mөгod kà, azladza tavàl tetəvi tsa kità aw kà...” (Guba akəs atà kà azladza, kà uwana azladza gesina tanəṇà Yuhana kà masla kà dza uwana Zəzagəla asləl à waṇ la dziriga)

33 Kà uwaga tagòd à Yesu: “Məsəl aw.” Yesu agòd à atà: “Ayyà, gi bay, gəpəhakulla dza uwana avà à gi tetəvi aṇa madàh tatak uwanay suwaṇ aw.”

12

Gay la gay la abà aṇa azlamagamza makəsafər gà

(Mata 21.33-46; Luka 20.9-19)

1 Yesu apəh à atà gay la gay la abà, agòd: “Dza anik atsəb matavəruk à guf aṇha à abà, akəsəl zlagam à adi; adàhà slaka à ahəṇ kà makudits iyaw mayyay matavəruk uwatà à abà, aṇàl gày

kà aṅa masla manəṅla guf. Asàkla à azlamagamza aṅha la ahàl, adà aṅha à mauguzahay anik kərkər.✧

² Uwana təla mahəṅay tatak adasa à waṅ, aslèl kohana aṅha à slaka azlamagamza uwatà kà, mavàl humà tatak aṅa guf aṅha suwaṅ.

³ Ama atà takəs magamza uwatà, tazlàb, takudək la ahàl deyday.

⁴ Dza aṅa guf aslèl kohana anik à slaka aṅatà aya. Azlamagamza tatsàh à gəl, ṅgaha tatsəkəkal magodahay à gəl.

⁵ Dza aṅa guf aslèl magamza anik aya. Masla kà takəd. Tadəhàhəṅ azlamagamza anik à vok aṅuvaw kalkal kiya uwaga, tazlàbàh azlaanik, ṅgaha azlaanik bay takəd atà.

⁶ Atəm kà dza aṅa guf à ahəṅ kà dza tekula pəra, bəzi gay ləv aṅha uwana awoyən məṅga. La madəvla à gay, aslèl à slaka aṅatà, adzùgw kà: 'Tadàzləb kona gulo haday aw ay', agòd.

⁷ Ama atà tagòd kà atà kà atà: 'Aganay dza uwana adàzuw gày. Sàw à waṅ, məkəd ṅgaha guf adàgəd à anu!'

⁸ Takàs masla, takəd masla, taməl à uda la guf la abà."

⁹ Yesu agòd: "Iyay zla, mana dza aṅa guf adàdehəṅ ma? Adàsa à waṅ, adàkad azlamagamza makəsafərga uwatà, adàvə guf uwatà à azlaanik.

¹⁰ Haday, kadzèṅàw gay uwanay la wakità Zəzagəla la abà:

'Akur uwana azlaməna maṅal gày taməlla kà, masla la uwana adapak akur mawəd gày.

✧ 12:1 12.1 Yesayya 5.1-2

- 11 Aganay uwana Sufəl Zəzagəla adahəŋ uwaga kà nadzipo la huma yewdi gami!"[☆]
- 12 Azlamadzahaga aŋa azla Yahudiya tayàh kà makəs Yesu, kà uwana atà tasəl, kà Yesu apəh gay la gay la abà uwaga kà lakəl aŋatà. Ama guba akəs atà, kà maham à ahəŋ dza, kà uwaga à uwana tasàkal, tadà aŋatà.

Mapəl hadama à məŋ sufəl
(Mata 22.15-22; Luka 20.20-26)

13 Ama katskats azlaməna mav tatak à Zəzagəla, la azlamadzahaga aŋa wakità seriya aŋa Zəzagəla, la azlamasiga tasləl azla Farisəya anik, la azlaanik la tataka aŋa maham à ahəŋ matsən vok gay la sufəl Herod kà magəɸ uwana à afik, azlayla kà vok kà makəsla.

14 Tasà à waŋ, tagòɸ à Yesu: "Məŋga, məsəl kà kapəhay kà say dziriga pəra, la madz à ahəŋ bokuba uwana asà à Zəzagəla, pəh à anu wakità seriya gami, ma avà à anu tetəvi aŋa mapəl hadama à məŋ sufəl Zəsar takay? Awma məpəlal aw takay?"

15 Ama Yesu asəl kà madzugway aŋatà kà mawisiga, agòɸ à atà: "Kà mana kavavaraw gi kiya uwaga ma? Sàwngəla sili uwaga à waŋ gəŋəŋəŋ."

16 Tasàlla sili à waŋ. Agòɸ à atà: "Gəl la sləm uwanay la sili la afik ma aŋa uwa?" Tagòɸal: "Aŋa Zəsar."

17 Yesu awùlla à atà ala: "Delga, vaw à məŋ sufəl Zəsar tatak uwana aŋha, vaw à Zəzagəla

[☆] 12:11 12.11 Mahabay 118.22-23

bay tatak uwana aṅa Zəzagəla.” Ləv avəl à atà à gay kà gay aṅha, məslək la ahəṅ aw.

Manavay lakəl aṅa mawul à uda la mamətsay (Mata 22.23-33; Luka 20.27-40)

¹⁸ Azlaanik la tataka aṅa azla Sadukiya la abà, tasà à waṅ à slaka Yesu. (Atà kà, mawul à uda la mamətsay la ahəṅ aw, tagòd)

¹⁹ Tagòd à Yesu: “Məṅga, Musa atsetsèr à anu mapəhay uwanay: ‘Baṅa dza anik amətsay, asàkiyà à mis aṅha à ahəṅ kokudə bəzi, say deda aṅha azəb mis à uda la gay kudə la abà. Ngaha abəziya azlabəza la mis uwatà kà à huma aṅa deda aṅha uwana aməts.’[☆]

²⁰ Azladedə zilga mədəf la ahəṅ. Magolga aṅatà azəb mis, ngaha aməts kokudə mayyay bəzi.

²¹ Masəla azəb à uda la gəy kudə la abà, amətsələn ala kokudə mayyi bəzi aya. Kiya uwaga apakà vok la maməkər aṅatà bay.

²² Kiya uwaga atà mədəf nna mis atsetsèr à atà à gay, taməts kokudə mayyi bəzi la masla. La lig la ahəṅ, mis aməts suwaṅ.

²³ Ngaha tak ma, la mok uwana azladza tadəwul à uda la mamətsay ma, mis ma adəgay ma aṅa uwa tak uwa? Kà uwana agà mis aṅatà mədəf nna!”

²⁴ Yesu awùlla à atà ala: “Kazawla hadəy zla! Kasəlaw wakità Zəzagəla aw, kasəlaw maslay aṅha babay aw.

²⁵ Kà uwana la vuɸ uwana azlamazimnekid tadəwul à uda la mamətsay kà, azlamis la

☆ 12:19 12.19 5Musa 25.5

azlazil tadàzab vok aya aw, ama tadàpakahay kà bokuba azlamalika, uwana la zagèla la afik pèra.

²⁶ Lakèl aña azlamazimnekid, uwana tawul à uda la mamòtsay kà, kadzèhàw òkiki la wakità la abà aw uwà? Pañaw ma uwala abadlamà à Musa la alal aña akal la abà, la gay kuswekuswe la abà ala? Agòdal: 'Gi Zèzagèla aña Abèraham, gi Zèzagèla aña Isak, ngaha gi Zèzagèla aña Yakuba bay.'[☆]

²⁷ Uwaga bokuba magoɗay kà Masla kà Zèzagèla aña azlamazimnekid aw, ama aña azlauwana la sifa. Gay gè la uwaga kazahawla la dziriga.”

*Mapèhay aña Zèzagèla uwana aɗuwa à vok
(Mata 22.34-40; Luka 10.25-28)*

²⁸ La kaslà uwatà madzahaga aña wakità seriya aña Zèzagèla la ahèj la abatà, atsèbà à atà slèm kà tabày vok à gay. Atsèhàj kà Yesu awùlla à azla Sadukiya kà lela. Azà vok à awtày, anàval à gay ala: “Mapèhay ma uwala à uwana aɗuwa vok ala?”

²⁹ Yesu awulàlla: “Aganay uwana aɗuwa azlaanik gesina: 'Tsèhàwwàj akul azladza Isèrayel! Sufèl Zèzagèla gami kà, masla Sufèl kokufa gèl aña.

³⁰ Wòyà Sufèl Zèzagèla aña la lèw aña gesina, la sifa aña gesina, la hankeali aña gesina, ngaha la ndzèda aña gesina.’

³¹ Aganay mapèhay masèla: 'Wòyà masla magay aña bokuba gèl aña!' Mapèhay uwanay la uwana aɗuwa azlaanik gesina.”

[☆] 12:26 12.26 2Musa 3.6

³² Məñ dza uwatà agòdɔfɔl: “Delga Sufəl, kapèh dziriga, Zəzagəla tekula, anik la ahəñ aw, say azladza takəs gay aña.

³³ Say dza awoy Zəzagəla la ləv aña, la hañkəli aña, la ndzəɔfa aña gesina, ñgaha bay awoy masla magay aña babay bokuba gəl aña. Manəf mapəhay səla uwaga la uwana aduwa tatak gesina uwana mədawal à akəl à tsəh kà aña Zəzagəla, la uwana məvəl gesina.”✧

³⁴ Yesu anəñəñ kà madzahaga aña wakità seriya uwatà awùlla à uda la hañkəli, ñgaha agòdɔfɔl: “Kak kà, kərkər la makoray Zəzagəla aw.”

La lig la ahəñ guba akès atà gesina kà manaval gay anik.

Dza uwana Zəzagəla afəl dzakwa à gəl ma Kona ma aña uwa?

(Mata 22.41-46; Luka 20.41-44)

³⁵ Mok uwana Yesu atàpatàla la gày Zəzagəla la aku, anàvə à atà gay uwanay: “Kakay azlamadhaga aña wakità seriya tagodɔfɔl kà: Dza uwana tafəl dzakwa à gəl, kà mayyi à tsəh ala aña David ma?

³⁶ Kà uwana Masasəɔdɔk Zəzagəla la uwana aguwa la David la abà, à uwana apəh la gəl aña: ‘Sufəl agòd à Sufəl gulo:

‘Dzà madzay la ahəl kaf gulo lakəl, ñgaha gədàbək azlaməna məzam aña k à tsəh asik aña.’✧

✧ 12:33 12.33 3Musa 19.18; 5Musa 4.35; 6.4-5; Hosəya 6.6

✧ 12:36 12.36 Mahabay 110.1

37 David la gəl aṅha azàlal Sufəl, ṅgaha ma kakay Kristu kà agay mayyi à tsəh ala aṅa David ma?”

Dahàw haṅkəli kà azlaməna wakità seriya aṅa Zəzagəla

(Mata 23.1-36; Luka 20.45-46)

Maham à ahəṅ dza aṅuvaw tatsənà gay aṅa Yesu la marabay.

38 Agòd à atà la matapla aṅha la abà: “Dahàw haṅkəli kà azlamadzahaga aṅa wakità seriya! Asa à atà mauguzahay la dawarawa mənḡa la vok, asa à atà kà azladza tasokw à atà la slaka maham gay à vok.

39 Tayahay kà slaka madza madzay delga la gày mazuw tatak may la aku.

40 Tazàb tatak à azlamis kudà ala, ṅgaha la madəv kudà zinjingə kà azladza aṅa magodəy kà atà azladza dziriga. Atà tadàbəzal seriya dzaṅdzaṅga.”

Mav tatak à Zəzagəla aṅa mis kudà

(Luka 21.1-4)

41 Yesu adzà madzay nekwa la sahar sili, la gày Zəzagəla la aku, ṅgaha anəṅà uwana azladza tabək sili à sahar à agu. Azlagalepi anik aṅuvaw tavəh mənḡa.

42 Mis kudà gə asà à waṅ, awìts nini səla à agu.

43 Yesu azàl azlaməna matapla la slaka aṅha, agòd à atà: “Gəgod à akul: mis kudà uwanay kà, avà sili uwana aduwa à azladza anik gesina,

44 kà uwana atà kà, tavə sili aṅa ləmana aṅatà mənḡa, ama mis kudà uwanay avà gesina, anik aṅha la ahəṅ kà mazuway aw.”

13

Makal gày Zəzagəla à ahəŋ (*Mata 24.1-2; Luka 21.5-6*)

¹ Uwana Yesu adasa à uda la gày Zəzagəla la aku, tekula la tataka aŋa azlaməna matapla la slaka aŋha agòfal: “Məŋga gulo, nərèz azlaakur aŋa gày uwanay tsi, atà dzəba aŋha səla aw!”

² Yesu awulàlla: “Kanəŋa gày məŋga uwanay ay? Amiyaka akur tekula kà, adàgəfal à gay aw. Azlaməna məzam tadəbazlah à ahəŋ gesina.”

Madzəka vok aŋa ŋərpə (*Mata 24.3-14; Luka 21.7-19*)

³ Yesu ahəd à gudəŋ à afik, adzà madzay la gudəŋ kuvu la afik, la huma magol gày Zəzagəla. Azla Piyer, Yakuba, Yuhana la Andəre uwana kokudə gəl aŋatà, tanàval:

⁴ “Pəhanula, mbà tatak uwanay adəpaka vok ma? La mana mədànəŋəŋ madəv à gay aŋa tatak uwaga adàsa à waŋ ma?”

⁵ La abatà Yesu adzəkà mapàhla ala la magoday: “Dahàw hanəkəli, dza avavar akul aw!

⁶ Kà uwana azladza aŋuvaw tadàsa à waŋ la sləm gulo, tadəgoday: ‘Gi la uwana, gi dza uwana Zəzagəla afəl dzakwa à gəl.’ Tadàzah azladza ala aŋuvaw.

⁷ Baŋa kadətsənaw gay guvəl la slaka nekwa gə, ŋgaha uwana la slaka kərkər gə kà, guba akəs akul aw. Say uwaga adapaka vok leri, ama uwaga kà makəf gəl aŋha dadəŋ aw.

⁸ Kà uwana azladza kutso anik tadəp guvəl la azladza kutso anik, makoray aŋa sufəl anik tadəp guvəl la makoray aŋa sufəl anik. Kutso

adàbèlaka vok la slaka anik anik, ngaha may mənğa adàsa à waŋ. Uwaga madzəka vok aŋa ngərpa bokuba mazay aŋa huɗ bəzi pəra.”

⁹ “Ama akul kà, ɗahàw haŋkəli kà gəl aŋkul, kà uwana tadàkasah akul, ngaha tadàɗahla akul à huma seriya. Tadàzlabah akul la gày madəv kuɗa la aku. Tadàtsazlah akul à huma azlaməŋga, la azlasufəl kà gay gulo, ngaha kadàpahaw gay gulo la huma aŋatà.

¹⁰ Say dza gesina la gudəŋ la vok tadàtsən gay Zəzagəla dadàŋ.

¹¹ Baŋa takas akul, tadala akul à huma seriya, guba adàkas akul dadàŋ, kà gay uwana kadàpəhaw à atà à adi aw. Ama baŋa kaslà adàsa à waŋ, gay uwana kadàpəhaw kà kadàbəzawwal la ləv aŋkul la tsəh, kà uwana gay uwanay kà, gay aŋa gəl aŋkul aw, ama Masasəɗok Zəzagəla adàvə à akul!

¹² Azladza tadàvah azladedə aŋatà la ahəl aŋatà kà makad atà. Baba bay adàva bəzi aŋha kà aŋa makəɗay, azlabəza bay tadàgohla afad à azlababa aŋatà à gəl, ngaha tadàkad atà.

¹³ Azladza gesina tadàpəsewah akul lakəl aŋa gay gulo. Ama dza uwana adàbasiŋ tsəràh à awtày la tetəvi Zəzagəla la ama kà, masla kà adàbəlay.”

Masla məzam aŋa dza uwana Zəzagəla afəl dzakwa à gəl

(Mata 24.15-28; 21.20-24)

¹⁴ Yesu agòɗ bay: “Kadànəŋaw dza uwana tazala: Məzam aŋa Zəzagəla adàdza madzay la slaka uwana azlayla aw, (Dza uwana adzeŋ

uwaga kà atsənəŋ lela!), azlauwana la Yahudiya tadəhoy à gudəŋ à afik.

¹⁵ Dza uwana la gəl gày, adàsa à vədah, ama adàda à gày kà mahəl tatak aŋha aya aw.

¹⁶ Dza uwana la guf la abà, adàwul à mtəga kà mahəl lukut aŋha bay aw.

¹⁷ Ŋgərpa kà aŋa azlamis uwana la bəza la hucf, ŋgaha azlamis uwana bəza vərna aga à atà la ahəl, la mavakay uwatà.

¹⁸ Dèvəw kuɖa à Zəzagəla kà tatak uwaga aŋa mapak vok la təla anasl aw.

¹⁹ La kaslā uwatà kà, ŋgərpa mənŋa adəgay la ahəŋ, uwana adapak vok dagay uwana Zəzagəla adahà gudəŋ à vok tsərəh à lakana aw, adəpaka vok bokuba uwaga aya dīkidiki aw.

²⁰ Ama Zəzagəla adag azlamavakay uwatà desl kà azladza aŋha uwana adatsatsamani à atà. Baŋa kiya uwaga aw, kà dza adàbəlay dīkidiki aw.”

²¹ “Kiya uwaga, baŋa dza anik agoɖ à akul: ‘Aganay dza uwana Zəzagəla afəl dzakwa à gəl la abanay, à agatà, la abatà’, kadiŋawwal gəl à vok aw!

²² Kà uwana azlaməna mapəh à atà gay à ahəl fidaga tadəsaha à waŋ, tadəpahla azlanadzipo anik anik ala, kà maz azladza uwana ala Zəzagəla adatsatsamni atà, à baŋa taslala vok.

²³ Akul zlà kà, dʁahəw haŋkəli! Gədapəh à akul tatak uwaga à vok à abà dagay uwarà.”

*Mawul à waŋ aŋa Kona aŋa dza
(Mata 24.29-31; Luka 21.25-28)*

24 “La mavakay uwatà, la lig aṅa ṅgərpa la ahəṅ, afats adàtəf à zagəla, təla adàudəy aya aw.

25 Azlatsetsiliṅ tadàsokw à ahəṅ la zagəla, azlamaslay uwana la zagəla la afik tadàbəlaka vok.

26 ṅgaha azladza gesina tadàṅəṅ Kona aṅa dza atsa à ahəṅ la habaga la abà, la ndzəɸa ṅgaha la mazləbay məṅga.✧

27 Adàsləl azlamalika aṅha à slaka gesina, kà maham à gay azladza uwana à vok Zəzagəla atsatsàmàṅi atà, dagay la gay tər gudəṅ à vok ufaɸ.”

Uwana gudəṅ apəhla ala

(Mata 24.32-35; Luka 21.29-33)

28 “Tapawla gay la gay la abà aṅa gudəṅ: Baṅa azləl ahəl mawga babasl aɸay, kasəlaw kà təla madara kà nekwa.

29 Kiya uwaga babay, baṅa kanəṅaw tatak uwaga apakà vok gesina, səlàw kà, Kona aṅa dza kà nekwa la gay gamagày kà mas à waṅ.

30 Haɸay, gəgod à akul: Azladza aṅa zamana uwanay tadàdəṅ à gay dadàṅ aw, say baṅa tatak uwanay adàpaka vok gesina dadàṅ.

31 Zagəla la kutso tadàdəṅ à gay, ama gay gulo kà, adàdəṅ à gay ɸikidiki aw.”

Zəzagəla pəra asəl kaslà madəṅ à gay

(Mata 24.36-44)

32 “Ama dza asəl mavakay uwatà, baṅaw kaslà uwatà aw, azlamalika uwana la zagəla la afik tasəl aw, Kona aṅa dza bay asəl aw, say Baba kokuɸa gəl aṅha pəra.

✧ 13:26 13.26 Yesayya 13.10; Yoyel 2.10,31; Daniyel 7.13

³³ Dahàw hanjkəli, kadzewhal aw, kà uwana kasəlaw mok uwana tatak uwaga adàpaka vok aw.

³⁴ Adàpakay kà bokuba dza uwana ad à mau-guzahay, asàkìyà à gày aṅha à ahəṅ, aviyà à ahàl aṅa azlamagamza aṅha, avàhà à atà sləray ala, ṅgaha agòd à masla manəṅla gamagày: ‘Say kanəṅla lela, kadzehal aw!’

³⁵ Kà uwaga dzàw à ahəṅ la adi, kà uwana kasəlaw mok uwana zil gày adàwul à waṅ aw, bi la mokokhu, bi la tataka vəf, bi la mawiyay gotsak, bi məl palaha.

³⁶ Baṅa atsa à waṅ katskats, abəza akul à gəl la madzəhal la abà aw.

³⁷ Tatak uwana gəgod à akul, gəgod à azladza gesina babay: Dzàw à ahəṅ la adi!”

14

Azlaməṅga tadaha dabaray kà makəs Yesu (Mata 26.1-5; Luka 22.1-2; Yuhana 11.45-53)

¹ A lig mavakay səla kà aṅa madzəka madəvaday Paska uwana azladza tazuw Pain kokudə tatak makəsliṅ, azlaməṅga aṅa azlaməna mav tatak à Zəzagəla, la azlamadzahaga aṅa wakità seriya aṅa Zəzagəla tayàh tetəvi la vud uwatà, kà makəs Yesu la dēmdēm, ṅgaha aṅa makəday.

² Tagod: “Mədàkəs la vud madəvaday aw, kà azladza aṅa madzəka magazlay aw.”

Mis adzadzab amàl matərsin à Yesu à gəl

³ Uwana Yesu la gudəṅ Betaniya, la kay aṅa Səmon, masla akàl zagəla, mok uwana adadza

madzay kà mazuw tatak may kà, mis anik asà à waŋ la amàl matərsin la ahàl la koloba gà, sləm aŋa amàl uwatà kà nar. Tsakalay aŋha kà zlazladfa. Mis uwatà apəzl koloba, adzadzàb matərsin uwatà à Yesu à gəl.

⁴ Azladza anik uwana la abatà kà, azìŋ atà à gəl, tagòd: “Kà mana awis amàl matərsin aŋha ala deyday ma?”

⁵ Agayŋa aduw matərsin gà ala aŋa sili dadərmokw makə, ŋgaha avàh sili gà azlaməna kudfa la uwana aduwa à vok.” Kiya uwaga taŋoŋüz à tsəh ala lakəl aŋha.

⁶ Ama Yesu agòd à atà: “Sàkàwwal! Kà mana kavərawla gay ma? Adàh à gi sləray delga gà.

⁷ Azlaməna kudfa kà, atà la slaka aŋkul koksikoksi, kaslawwalla vok aŋa madaha à atà delga koksikoksi bokuba uwana asa à akul. Ama gi gədàdza à ahəŋ la akul koksikoksi aw.

⁸ Mis uwanay adahà uwana aslàla vok. Masla adàh gi amàl matərsin à vok kà, kà madàh gi à ahəŋ aŋa maf gi à zəvay à agu.

⁹ Hadfay, gəgòd à akul: La gudəŋ la vok gesina, uwana tadəpah gay marabəŋ, tadəpəhay bay tatak uwana mis uwanay adahəŋ, ŋgaha mis uwanay adàwul à atà à gəl.”

Yudas asal mat kaf à Yesu à gəl

(Mata 26.11-16; Luka 22.3-6)

¹⁰ La lig la ahəŋ, Yudas Iskariyot, tekula la tataka aŋa azlaməna matapla kulo gəl aŋha səla la abà, ahàd à slaka azlamadzahaga aŋa azlaməna mav tatak à Zəzagəla kà mat kaf à Yesu à gəl.

¹¹ Uwana tatsənà uwaga kà, taràb, tagòfal: “Mədàvà à ka sili.” Dagay kaslà uwatà, Yudas ayàh tetəvi kà mapəhla Yesu ala.

Yesu azuw tatak may aṇa Paska

la azlaməna matapla la slaka aṇha kulo gəl aṇha səla

(Mata 26.17-25; Luka 22.7-14; Yuhana 13.21-30)

¹² La mavakay teraṇa aṇa madəvaday Pain kokudà tatak makəsliṇ, vudf makadf magadzaw aṇa Paska, azlaməna matapla aṇha tanàval à gay la: “Lala asa à ka kà məday kà madfàh à ka tatak may aṇa madəvaday Paska à ahəṇ la?”

¹³ Yesu aslèl azladza səla la tataka aṇatà la abà, agòd à atà: “Dàw à gudəṇ à abà, dza la ahəṇ la tuguzl lakəl, la iyaw gà, kadàgagamaw akul nna.

¹⁴ Nəfàw à gày uwana à abà adàda à agu, gòdàw à zil gày uwatà kà: Məṇga gami agodf à ka: ‘Lala à gày gulo, uwana gədàzuw tatak may aṇa Paska la aku la azlaməna matapla gulo li? agodf’, gòdàwwal.

¹⁵ Masla adəpəhakulla gày məṇga uwana la afik gà, slaka madfehəṇ à ahəṇ gà gesina. La abatà la uwana kadàcfahaw vok à ahəṇ gesina kà aṇami.”

¹⁶ Azlaməna matapla la slaka aṇha tahàd, tahàd à hudf gudəṇ à abà, tabəzà tatak à gəl bokuba uwana Yesu apəhatàla. Uwana tadfàh tatak may Paska à ahəṇ kà, tawùl à slaka Yesu.

¹⁷ Uwana mokokhu adasa à waṇ kà, Yesu abəz à abatà la azlaməna matapla aṇha kulo gəl aṇha səla.

18 Mok uwana tadzà madzay, tazùw tatak may, Yesu agòd à atà: “Haday, gəgòd à akul, tekula la tataka ankul la abà uwana məzuw tatak may səla adàta à gi kaf à gəl.”✧

19 Azlaməna matapla la slaka anha tadzəkà mazawla à gəl, tagòfal la tekula tekula anjatà: “Gi zlàk uwà? Gi zlàk uwà?”

20 Yesu agòd à atà: “Dza tekula la tataka ankul la abà, uwana mədəb aləl à kaf à gəl anu səla, la uwana adàta à gi kaf à gəl.

21 Ndzer gi, gi Kona anja dza gədàmətsay bokuba uwana tatsetsèr à wakità à abà lakəl gulo. Ama ngərpa adəgay la dza uwana adətəg kaf à gəl anja Kona anja dza agay, tayyì dza uwaga aw kà n̄ləm kà masla.”

Tatak may tsikaslaga

(Mata 26.26-30; Luka 22.15-20; 1 Korintiya 11.23-25)

22 La mok uwana tazùw tatak may, Yesu azəb kaf, atsàkàn̄ ala, ‘Kikay’ agòd à Zəzagəla, ngaha avà à azlaməna matapla la slaka anha, agòd à atà: “Zùwàw uwaga kà vok gulo!”

23 Ngaha azəb kətsaw la iyaw mayyay ahàf gà, ‘Kikay’, agòd à Zəzagəla, avà à atà, atà gesina tasà à uda la abà,

24 ngaha agòd à atà: “Uwaga kà aniz gulo, aniz makəs vok slawda la Zəzagəla, uwana asokw à vədah kà anja azladza anuvaw.

25 Haday, gəgòd à akul, gədàsa iyaw mayyay ahàf uwanay aya aw, tsərəh à uwana mədàsay anina aya la makoray Zəzagəla.”

✧ 14:18 14.18 Mahabay 41.9

²⁶ Tazlɔbà Zəzagəla la mahabay, ŋgaha tasà à uda, tadà aɲatà à gudəŋ kuvu à afik.

Yesu atà la Piyer

(Mata 26.31-35; Luka 22.31-34; Yuhana 13.36-38)

²⁷ Yesu agòɔf à azlaməna matapla la slaka aɲha: “Akul gesina kadàsakaw gi à ahəŋ, kadàhoy à waŋ akul, kà uwana uwaga kà matsetserayga la wakità Zəzagəla la abà: ‘Gədàkəɔf masla manəŋla azlatuwaŋ, azlatuwaŋ tadàvah gəl à ahəŋ.’[☆]

²⁸ Ama la lig la ahəŋ, gədàwul à uda la mamətsay, gədàtsəvokay kà akul kà mad à Galili.”

²⁹ Piyer agòɔfal: “Amiyaka azladza gesina tasak à kak à ahəŋ kà, gi kà, gədàsak à kak à ahəŋ aw.”

³⁰ Ngaha Yesu awùllal ala: “Haday, gəpəh à ka, la vudf uwanay lakana, gurayŋa mewgdzagalaŋ awiyay asik səla kà, kà kak Piyer kadàgoday kà, kà kasəl gi aw, asik makər.”

³¹ Ama Piyer agòɔf la ndzəɔfa aya: “Gədàpəh tsəhay gay uwaga aw, gəmətsay ndzer la kak!” Atà gesina tagòɔf kiya uwaga babay.

Yesu adəv kuɔfa la Getsemane

(Mata 26.36-46; Luka 22.39-46)

³² Tabəz à slaka anik uwana sləm aɲha Getsemane. Yesu agòɔf à azlaməna matapla la slaka aɲha: “Dzàw à abanay, gəda à madəv kuɔfa!”

³³ Yesu ahəl azla Piyer, Yakuba la Yuhana kà maday atà nna. Adzəkà maskulay la mazaw la gəl.

[☆] 14:27 14.27 Zakari 13.7

³⁴ Agòd à atà: “Mazaw la gəl akəf gi. Ama dzàw la abanay, dzèwhàl aw!”

³⁵ Azà à atà vok la vok ala ηuv, atəd à vədah, adèv kuḏa à Zəzagəla: “Baṇa kaslala vok, vā à gi tetəvi, kà kaslà aṇa ηgərpa ada aṇha la slaka gulo.

³⁶ Iyay Baba gulo, kaslala vok kà madəh tatak gesina. Zəbagəṇ kətsaw ηgərpa uwanay ala la slaka gulo. Ama bokuba uwana asa à gi aw, say bokuba uwana asa à ka.”

³⁷ Ngaha awùl à waṇ, abəzà azlaməna mata-pla aṇha makər uwatà à gəl, atà la madzəhal gə. Agòd à Piyer: “Səmon, kadzəhal ay? Kaslala vok aṇa madz à ahəṇ la adi sa tekula aw ay?

³⁸ Akul gesina dzàw à ahəṇ la adi, dèvəw kuḏa kà matədiya à mavavaray à abà aw. Hadəy, masasədok aṇa dza asal makəs gay, ama vok aṇha la nzdəḏa aw!”

³⁹ Ngaha adà aṇha aya. Adèv kuḏa kalkal uwana uwarà.

⁴⁰ Uwana awùl à waṇ, abəzà atà à gəl la madzəhal gə. Taslələ vok aṇa madz à ahəṇ la adi aw. Tasəl uwana tawùllal ala aw.

⁴¹ Uwana awùl à waṇ à slaka aṇatà aṇa makər aṇha, agòd à atà: “Kadzəwhal, kaduwaw ləv ay? Diga adagay, sa kà adaslay. Lagwa azlaməna tsakana takəs Kona aṇa dza.

⁴² Sàw à afik, məhəd adagay, aganay dza uwana atəg à gi kaf à gəl kà adazlanay”, Yesu agòd à atà.

Makəs Yesu
(Mata 26.47-56; Luka 22.47-53; Yuhana 18.3-12)

43 Mok uwana Yesu avàts gay dadàñ, Yudas, tekula la tataka aña azlakulo gəl aña səla la abà, asà à wañ. Maham à ahəñ dza aņuvaw tanəfà à wañ la katsakar, la zəva. Məñ madzahaga aña azlaməna mav tatak à Zəzagəla, la azlamadzahaga aña wakitə seriya aña Zəzagəla, la azlamasiga la uwana taslèlla atà.

44 Yudas uwana atəl kaf à gəl apəhla dabaray à maham à ahəñ dza kà makəs Yesu. Agòđ: “Dza uwana gədəsəkwiñ maslawda slawda kà, masla la uwana kayahaw, kadà, kəsàw, đawùlla nəñàwla.”

45 Uwana adabəz à abatà, katskats ahàd à slaka Yesu, agòđ: “Mənga gulo!”, akəsà vok.

46 Azladza takəs Yesu, tawəslàhəñ à ahəñ.

47 Ama tekula la tataka azlaməna matapla la abà, atsizilla ala, abəđ katsakar aña à lag, adəđ magamza aña mənga aña azlaməna mav tatak à Zəzagəla, anətsal sləm lakəl ala.

48 Yesu agòđ à maham à ahəñ dza: “Kà mana katsàw à wəñ la katsakar ŋgaha la zəva la ahəl kà aña makəs gi ma? Gi masla nabəra ay?”

49 Kəla mavakay gədzà à ahəñ la akul la məñ gày Zəzagəla la aku, gətəpakulla tatak, akul bay kakəsàw gi aw. Ama uwaga apaka vok kà madəvəñ à gay tatak uwana azlaməna mapəh à atà gay à ahəl tapəh dagay uwarà.”

50 Ŋgaha azlaməna matapla la slaka aña gesina tasàkal à ahəñ. Tahòy aņatà.

51 Kohana anik la ahəñ, anəfà Yesu la peteli la vok pəra. Tayàh kà makəsay.

52 Ama asàkatàla peteli à ahəñ, ahòy aña ala

diga.

Yesu la huma seriya

(Mata 26.57-68; Luka 22.54-55; Yuhana 18.13-14,19-24)

⁵³ Maham à ahəŋ dza tadàla Yesu à slaka mənğa aŋa azlaməna mav tatak à Zəzagəla, la azlamagol dza la azlamadzahaga aŋa wakità seriya aŋa Zəzagəla. Gesina tahamà gay à vok.

⁵⁴ Piyer anəfà atà la lig kərkər, adà à kodal aŋa mənğa aŋa azlaməna mav tatak à Zəzagəla à abà, adzà madzay la azlaslodzi à vəda akàl à vok.

⁵⁵ Azlamənğa aŋa azlaməna mav tatak la azlamadzahaga gesina tayàh dabaray aŋa makəsalla fida à gəl aŋa madukwla seriya mamətsay à gəl, ama tabəzà à mawisiga aŋha aw.

⁵⁶ Kà uwana uwabeyuwi atüğw gay fida lakəl aŋha, ama fida aŋatà akəsà vok aw.

⁵⁷ Azlanik aŋatà tasà à afik ŋgaha tatsədal azlafida anik anik à gəl gesina.

⁵⁸ “Mətsənəŋ agòd kà: ‘Gədàkal magol gày Zəzagəla uwanay à ahəŋ, uwana azladza tanjàl la ahàl la mahənay makər, gədàhənəŋ ala kokuɗa maf ahàl à abà aŋa azladza’, agòd.”

⁵⁹ Baməraka la madàh fida uwatà, gay aŋatà akès à vok aw.

⁶⁰ Mənğa aŋa azlaməna mav tatak asà à afik, atsizilla ala la tataka azladza la abà gesina, anavà Yesu la gay ala: “Kawulla gay à uda aw takay? Mana à uwana tatugw kà gəl tak ma?”

⁶¹ Ama Yesu adzà à ahəŋ titi. Awùlla gay à uda aw. Mənğa aŋa azlaməna mav tatak anavà

Yesu aya: “Kak Kristu, Kona aṅa Zəzagəla uwana tazləḅay ay?”

⁶² Yesu agòḍal: “Bà kiya uwaga, kadàṅəṅaw Kona aṅa dza madza madzayga la ahàl kaf aṅa Zəzagəla lakəl la maslay, la mazləḅay məṅga, ṅgaha atsa à ahəṅ la habaga zagəla la abà.”☆

⁶³ Məṅga aṅa azlaməna mav tatak akwàhà lukut aṅha ala, agòḍ: “Məwoya sayda anik lakəl aṅha aya aw!

⁶⁴ Katsəṅàw uwana apəh mawisiga lakəl aṅa Zəzagəla. Mana kadzəgwaw ma?” Gesina aṅatà tadùkwla seriya mamətsay à gəl.

⁶⁵ Azladza anik la tataka aṅatà la abà tadzəkà mataf slesliḅ à Yesu à adi. Tatsàkal à yewdi à ama, tazlàḅ la mamits ahàl, ṅgaha tagòḍal: “Pəhanula, uwa à uwana adəḍ à ka uwa?” Azlaslodzi takəs Yesu, ṅgaha tabakàlla ahàl à sləm à abà.

“Gəsəl Yesu aw”, Piyer agod

(Mata 26.69-75; Luka 22.56-62; Yuhana 18.15-18,25-27)

⁶⁶ Piyer la gəl akəl dadəṅ, à uwana dugu madzadzaray aṅa məṅga aṅa azlaməna mav tatak asà à waṅ.

⁶⁷ Uwana anəṅà Piyer à vəḍa akəl à vok kà, anəṛəz, agòḍ: “Kak bay, kadzà à ahəṅ la Yesu, zil Nazaret.”

⁶⁸ Ama Piyer adahà fida, agòḍ: “Gəsəl aw, gətsəna gay uwaga asa à ka magodfay aw!” ṅgaha asà à uda, adà aṅha à dzogdzog à abà. Mok uwatà mewgdzagalan awiyà.

☆ 14:62 14.62 Daniyel 7.13

⁶⁹ Dugu madzadzaray anəḡà Piyer aya, agòḡ à azladza uwana la abatà aya: “Dza uwanay kà tekula aḡatà bay!”

⁷⁰ Ama Piyer agòḡ aya: “Awan, gi tekula aḡatà aw.” La lig la ahəḡ ḡuv, azladza uwana la abatà tagòḡ à Piyer: “Hadʒay, kak bay, kak tekula aḡatà, kà uwana kak zil Galili.”

⁷¹ Piyer adzəkà magodʒay: “Baḡa gəḡàh fida, say Zəzagəla avà à gi ḡḡərpə zagəla. Gəsəl dza uwaga kapəhaw gay aḡha ḡikiḡiki aw!”

⁷² La mok uwatà mewgdzagalaḡ awiyà kà masəla. Gay uwana Yesu apəh, awùl à Piyer à gəl: ‘Mok uwana mewgdzagalaḡ awiyay asik səla dadəḡ aw, kadəgodʒay asik makər kà, kasəl gi aw.’ Piyer adzəkà matuway.

15

*Yesu la huma Pilatus
(Mata 27.1-2; 11-14; Luka 23.1-5; Yuhana 18.28-38)*

¹ Bəḡ la zay la tsəh, azlaməḡga aḡa azlaməna mav tatak takəs sawaray la azlamadzahaga aḡa wakità seriya aḡa Zəzagəla gesina, tatsurkà Yesu, tadàlla, tavà à Pilatus à ahàl à afik.

² Pilatus anavà Yesu la gay ala: “Kak Sufəl aḡa azla Yahudiya ay?” Yesu awulàlla: “Iyay, bokuba uwana kagòḡ.”

³ Azlaməḡga aḡa azlaməna mav tatak, takəl gay à Yesu à vok aḡuvaw.

⁴ Pilatus anavà Yesu aya: “Kawulla à gay à uda aw uwà? Tsənà makəl à ka gay à vok aḡatà tsi.”

⁵ Ama Yesu awùlla à gay à uda aw. Ləv avàl à Pilatus à gay kà uwaga.

Seriya mamətsay atəf à Yesu à gəl
(Mata 27.15-26; Luka 23.13-25; Yuhana 18.39-19.16)

⁶ Kəla madəvaday Paska, Pilatus adùwatàla gəl à masla dañay tekula, uwana maham à ahəñ awoyàñ.

⁷ La mok uwatà, dza tekula la ahəñ la dañay la aku, sləm aña Barabas. Masla tekula aña azlaməna mazləl guvəl à gumna à adi, takəf dza la magazlay la abà.

⁸ Maham à ahəñ dza ahəd à mtəga Pilatus kà aña manav uwana Pilatus adahàhàtàn viya viya.

⁹ Pilatus anavà atà à gay ala: “Asa à akul kà gəduwakulla gəl Sufəl aña azla Yahudiya ay?”

¹⁰ Kà uwana asəl kà azlaməngga aña azlaməna mav tatak tadàla Yesu à slaka aña kà mañor pəra.

¹¹ Ama azlaməngga aña azlaməna mav tatak tavədzàhà à tsəh azladza à afik kà Pilatus aduwatàla gəl kà Barabas.

¹² Pilatus agòf à maham à ahəñ dza aya: “Mana asa à akul gədehəñ à dza uwanay à vok kazalawla ala Sufəl aña azla Yahudiya ma?”

¹³ Tawulàlla la mawiyay: “Zlèl masla à ahàf à adi!”

¹⁴ Pilatus anavà atà: “Mana mawisiga aña uwana adahəñ ma?” Ama tazàla mawiyay à gəl aya: “Zlèl masla à ahàf à adi!”

¹⁵ Pilatus awoyà marab ləv aña azladza. Kà uwaga à uwana aduwà à atà gəl à Barabas. Nğaha agòf à azlaslodzi kà tasläh Yesu ala la kurpi, avà à atà masla à ahàl kà mazləliya à ahàf à adi.

*Azlaslodzi takəɖasl à Yesu
(Mata 27.27-31; Yuhana 19.2-3)*

¹⁶ Azlaslodzi tadàla Yesu à gəl akəl aṇa Pilatus, tazàlähà azlaslodzi gesina.

¹⁷ Tadùwal dawara mativga à vok, taslàslàp atək, tatsefàɖal à gəl magabaga gabaga aṇa sufəl kà makəɖaslal.

¹⁸ Nḡaha tasukwà masla: “Ayyi, Sufəl aṇa azla Yahudiya!”

¹⁹ Tafəɖ à gəl la kavak, tatàfal slesliɓ à vok, takəɖèɖ à ahəṇ la huma aṇha bokuba sufəl kà madzedzinay.

²⁰ Uwana tadèv makəɖaslal à gay, tasə̀rətal dawara mativga uwatà la vok ala, tawùllal lukut aṇha à vok, nḡaha tadàla à uda kà aṇa mazləl à ahàf à adi.

Tazləl Yesu à ahàf à adi

(Mata 27.32-44; Luka 23.26-43; Yuhana 19.17-27)

²¹ La tetəvi la ama, tagagàm la dza, uwana zil gudəṇ Səren, sləm aṇha Səmon baba aṇa Alekəsander atà la Rufus. Masla atsà à waṇ la guf aṇha la abà. Azlaslodzi tafəl ndzəɖa à gəl aṇa mazəɓ ahàf aṇa Yesu.

²² Tadàla Yesu à slaka uwana sləm aṇha *Golgota*. (Bokuba magoɖay: slaka aslasl takasa à gəl)

²³ La abatà asà à atà aṇa maval iyaw hamhamga uwana tatedàlla mir à tsəh, kà mataslala maziṇ ala, ama Yesu akweskà kà masay.

²⁴ Nḡaha tatatəsl Yesu à ahàf à adi. Tavàhà lukut aṇha la tataka aṇatà la abà, tatsàl tsatsa

lakəl, kà uwana asà à atà masəl tatak uwana uwabeyuwi aṇatà abèzal.✧

²⁵ Mok uwana tatàsl Yesu à ahàf à adi kà zil gosela.

²⁶ Tatsetsèr à gəl aṇha gay seriya tapèhla ala la magoḏay gay uwana takèḏ ala: SUFƏL AṆA AZLA YAHUDIYA.

²⁷ Tatatàsl azlaməna nabəra səla à ahàf à adi la Yesu, tekula la ahàl kaf aṇha, tekula bay la ahàl gudzay aṇha. ((

²⁸ Kiya uwaga agay bokuba uwana tatsetsèr à wakità Zəzagəla à abà:

Tatugw masla à tataka aṇa azlaməna haypa à abà.))✧

²⁹ Azladza uwana taguwàhà à awtày la abatà takèḏàslal, takokòtəhà gəl, tagòḏfal: “Nəṇàṇ zla! Kak uwana kagòḏ kà, asa à ka makal magol gày Zəzagəla à ahəṇ, aṇa maṇalay anik la mavakay makər, kagòḏ.✧

³⁰ Sà à ahəṇ la ahàf la adi, bəlla gəl aṇak tak zla!”

³¹ Kiya uwaga babay azlaməṇga aṇa azlaməna mav tatak takèḏàslal la azlamadzahaga aṇa wakità seriya aṇa Zəzagəla la slaka gə, tagòḏ kà atà kà atà: “Abəlà azladza anik, ama aslala vok aṇa mabəl gəl aṇha aw uwà?”

³² Say mənəṇəṇ Mesi, Sufəl aṇa Isərayel atsa à ahəṇ la ahàf la adi dadàṇ, ṇgaha məḏiṇal gəl à vok.” Azladza uwana tatatàsl à ahàf à adi tatsəkal magoḏahay à gəl babay.

✧ 15:24 15.24 Mahabay 22.18 ✧ 15:28 15.28 Yesayya 53.12

✧ 15:29 15.29 Mahabay 22.7

Mamətsay aᅇa Yesu

(*Mata 27.45-56; Luka 23.44-49; Yuhana 19.28-30*)

³³ La tataka afats, mələs apakà vok la kutso la abà gesina, tsərəh afats dat mogova gova gərewni delga.

³⁴ La afats dat magova gova gərewni delga uwatà, Yesu awiyà la ndzəɗa, agòɗ: “*Eloyyi, Eloyyi, lema sabachthani?*”.* (Bokuba magoday: Zəzagəla gulo, Zəzagəla gulo, kà mana kasak gi ma?)

³⁵ Azlaanik uwana tadzà à ahəᅇ la abatà tatsənà uwaga, tagòɗ kà: “Aganay azalay à dza uwana Zəzagəla apəhal gay à ahàl à uwana sləm aᅇha Eliya.”

³⁶ Dza tekula ahòy à awtày la abatà, ahənà sawsaw ala la iyaw hamhamga, afà sawsaw à gay kavak, avàl kà makokuzay, agòɗ: “Tsetsi mədza à ahəᅇ titi, mənərèz à baᅇa Eliya atsa à waᅇ kà aᅇa mazəb à ahəᅇ la ahàf la adi!”*

³⁷ Ama Yesu awiyà la ndzəɗa, ᅇgaha amèts.

³⁸ Ama bafta məᅇga uwana la gày Zəzagəla la aku, akohàla tsərəɗ, tsərəh à afik, tsərəh à vəɗah.*

³⁹ Məᅇga aᅇa azlaslodzi dzim, uwana atsizl à huma aᅇa Yesu, anəᅇà mamətsay aᅇha, à uwana adawiyay, agòɗ: “Hadəy, dza uwanay kà Kona aᅇa Zəzagəla!”

⁴⁰ Azlamis uwana tanəᅇà à awtày kərker la ahəᅇ, la abatà la tataka aᅇatà la abà, Mariyama

* **15:34 15.34** Mahabay 22.1 * **15:36 15.36** Mahabay 69.21

* **15:38 15.38** 2Musa 26.31-33

dөг zla Magdala, la Mariyama iyà aña Yakuba uwana bəziga la Yosəs, la Salome.

⁴¹ Tauguzàhàh la azla Yesu, à mok uwana agà la gudəŋ Galili. La abatà bay azlamis anik aņuvaw tahàd la azla Yesu la slaka gà à Urusalima à afik.

Maf Yesu à zəvay à agu

(Mata 27.57-61; Luka 23.50-56; Yuhana 19.38-42)

⁴² Lagwa kà mokokhu adagay, uwaga mavakay mađàh vok à ahəŋ bokuba magođay vuđ mađàh vok aña vuđ madu w ləv.

⁴³ La gay mokokhu, Yusufu zil Arimate asà à waŋ, masla tekula la tataka aña azlamasiga la abà. Masla kà akùd makoray Zəzagəla babay. Kurit yewdi agòdal kà madiya à slaka Pilatus aw. Anàv vok aña Yesu.

⁴⁴ Ama ləv avàl à Pilatus à gay, kà uwana atsənəŋ kà Yesu adamətsay katskats. Azàla məŋga aña azlaslodzi dzim, anàv la slaka aňha: “Aməts ma uwarà ay?”

⁴⁵ Uwana adatsən dziriga la slaka məŋga aña azlaslodzi dzim, avà tetəvi à Yusufu kà mazəb vok aña Yesu.

⁴⁶ Yusufu asùkw bafta, azəb vok aña Yesu à ahəŋ la ahàf la adi, afafàd à bafta uwatà à abà, afà à zəvay à agu, zəvay kà tàlla kà à tsakur à abà. Nğaha atakòslal məŋ abəlam à ama.

⁴⁷ Mariyama dөг zla Magdala, la Mariyama iyà aña Yosəs tanəŋà zəvay uwana tafà Yesu à agu

16

*Mawul à uda la mamətsay anja Yesu
(Mata 28.1-8; Luka 24.1-12; Yuhana 20.1-10)*

¹ Uwana mavakay maduw ləv adada à lig, Mariyama dæg zla Magdala, la Mariyama iyà anja Yakuba, la Salome tasùkw aməl matərsin kà anja madla anja madəhiya à Yesu à vok.

² Bəŋ la zay la tsəh, vuɸ ladu uwana afats à lig mas à afik, tahəd à gəl zəvay.

³ Tagòɸ kà atà kà atà: “Uwa adətakosl anu à bəlam à zəvay la ama ala uwa?”

⁴ Kà uwana bəlam uwatà kà mənğa. Ama tanənà à awtày kà, tanənà bəlam matakoslal à ama ala gə tsewwa.

⁵ Tahəd à zəvay à agu. Tanənà bəzi kohana uwana adzà madzay la abatà la ahəl kaf lakəl, la lukut medfekuga la vok. Guba akəs atà.

⁶ Agòɸ à atà: “Guba akəs akul aw! Kayhaw Yesu zil Nazaret, uwana tatatəsl à ahàf à adi. Aga la abanay aw, awùl à uda la mamətsay. Aganay slaka anha uwana tahənənəŋ à ahənəŋ.

⁷ Lagwa kà, dàw, kadàgoɸaw à azlaməna matapla anha, kaykay gə kà à Piyer à gay uwanay: Yesu atsavokkay kà akul kà mad à Galili. La abatà kadənənəŋawwanəŋ bokuba uwana agòɸ à akul.”

⁸ Azlamis tasà à uda la zəvay la aku, tahòy. Ləv avəl atà à gay la guba mənğa. Tabadmə à dza aw kà uwana guba akəs atà.

*Yesu apəhla vok à Mariyama dæg zla Magdala
(Mata 28.9-10; Yuhana 20.11-18)*

⁹ Uwana Yesu adawul à uda la mamøtsay, bøn vud ladu apèhla vok à Mariyama dæg zla Magdala dadàñ. (Mis uwana akudèkal azlamasæðok mawisiga mæðef lakèl ala)

¹⁰ Mariyama ahàd kà mapèh uwaga à azladza uwana tadzàhà à ahøn la Yesu, tazàwla gèl, ñgaha tataw.

¹¹ Ama mok uwana tatsənà uwana apèh à atà kà, Yesu aga la ahøn la sifa kà, ñgaha kà masla anønàñ kà, atà tadìñal gèl à vok aw.

Yesu apèhla vok à azlaməna matapla aña səla
(Luka 24.13-35)

¹² La lig la ahøn, Yesu apèhla vok à azlaməna matapla aña səla. La mok uwana atà tahàd à mauguzahay à bəzi gudəñ anik à abà.

¹³ Tawul à Urusalima à abà, tapèh à azladza anik, ama atà bay kà, tadìñal gèl à vok aw.

Yesu apèhla vok à azlaməna matapla aña kulo gəl aña tekula
(Mata 28.16-20; Luka 24.36-49; Yuhana 20.19-23; Sləray 1.6-8)

¹⁴ La lig la ahøn, Yesu apèhla vok à azlaməna matapla la slaka aña kulo gəl aña tekula, la mok uwana atà la tatak may lakèl. Agòd à atà kà, atà la madìñal gèl à vok aw, atà la ləv dzañ-dzaña. Kà uwana tadìñ gèl à azladza uwana à vok, tagòd à atà kà tadanøn la sifa aw.

¹⁵ Yesu agòd à atà: “Dàw à gudəñ à vok gesina, zàwàñ, pèhàw gay Zəzagəla à azladza gesina!

¹⁶ Dza uwana adiṅal gəl à vok adàhalla batem, adàbəlay. Dza uwana adiṅal gəl à vok aw Zəzagəla adàfahalla seriya à gəl.

¹⁷ Aganay azlanadzipo la maslay uwana azlaməna madiṅal gəl à vok tadàfah à ahəṅ la sləm gulo: Tadàslala vok makudəkàh azlamasəfok mawisiga, tadàvatsah azlagay məlok gə,

¹⁸ tadàkas azlabebi la ahəl amiyaka tadàsa magur bay kà, aza à atà aw. Tadàfak ahəl à azlaməna fuvats à gəl, ṅgaha tadàwur ala.”

Yesu awul à slaka Zəzagəla

(Luka 24.50-53; Sləray 1.9-11)

¹⁹ La mok uwana Sufəl Yesu adadəv gay aṅha à gay, adà aṅha à zagəla, adzà madzay la ahəl kaf aṅa Zəzagəla lakəl.

²⁰ Azlaməna asik aṅha, tahəd à gudəṅ à vok gesina aṅa maz gay matsidəyga aṅa Sufəl Zəzagəla. Sufəl Yesu adfahà sləray la atà aya gotənaṅ, apəhla dziriga aṅa gay aṅatà ala la madfah nadzipo aṅuvaw.

**Wakità Zəzagəla Wakitə Aŋa Makəs Vok
Slawda Mawga (Cameroun)
Matal: Wakitə Zəzagəla Wakitə Aŋa Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 28 Dec 2024 from source
files dated 29 Jan 2022

03efbf2f-98ca-5534-8610-0be3a8c4b974